

informativni

bilten



Općine Hadžići

Besplatan primjerak

Decembar 2019. Broj 29

Ejubović:
U 2019. godini uložili smo
8,1 milion KM u infrastrukturu

ROBOT CENTAR
otvorio svoja vrata u Hadžićima



Preduzeće „Tako“ otvara
proizvodni pogon u Hadžićima



Asfaltiran put
ŽUNOVNICA-KASATIĆI



✉ ohadzici@bih.net.ba

☎ +387 33 475 900 +387 33 475 952

www.hadzici.ba





**DECEMBAR,
2019.**

informativni

bilten

Općine Hadžići

Izdavač:

Općina Hadžići

Bilten pripremio:

Adnan Čolo

Foto:

Adnan Čolo
Šejla Šehovć-Šikalo

Adresa:

Hadželi 114
71240 Hadžići
Bosna i Hercegovina

E-mail:

ohadzici@bih.net.ba
opcina.hadzici@gmail.com
kabinet@hadzici.ba

Web:

www.hadzici.ba

Kontakt informacije:

+387 33 475 900
+387 33 475 952
+387 33 475 957

Općina Hadžići : Potvrđen standard ISO 9001:2015



Ocjenom auditora Certifikacijske kuće “Bureau Veritas” Halila Gutošića, Općina Hadžići je uspješno provela usklađivanje poslova i zadataka sa međunarodnim standardom ISO 9001:2015. Ovo je izneseno na završnom sastanku auditora Gutošića sa rukovodiocima Općine Hadžići održanom 24. oktobra 2019. godine. Potvrđeno je da sistem funkcioniše, održava se i evidentna su poboljšanja u pružanju usluga građanima. Jedna od najbitnijih činjenica kada je u pitanju ovaj standard jeste da su građani uključeni u planiranje budžeta, program prioriteta, komunalne infrastrukture i izrade značajnih strategija. Općini Hadžići standard ISO 9001:2015 važi do 2021. godine.





BUDŽET OPĆINE HADŽIĆI REBALANSOM POVEĆAN NA 17,9 MILIONA KM



Na 28. redovnoj sjednici Općinskog vijeća Hadžići održanoj 15. augusta 2019. godine usvojena je Odluka o izmjenama i dopunama Budžeta Općine Hadžići za 2019. godinu. Korekcija Budžeta u odnosu na Plan za 2019. godinu, predložena je na prihodovnoj strani i odnosi se na povećanje u iznosu od 3.946.514,00 KM te ukupni Budžet Općine Hadžići za 2019. godinu iznosi 17.942.514,00

KM. U istom iznosu planirani su i rashodi te je postignuta uravnoteženost Budžeta i time su ispoštovane zakonske odredbe. Podsjećamo, prvobitno predloženi Budžet Općine Hadžići za 2019. godinu iznosio je 13.966.000 KM. Općina Hadžići nastavlja izuzetno uspješan put razvoja koji je rezultat izuzetnog rada i zalaganja posebno Općinskog načelnika te Općinskih službi.





Ejubović: U 2019. GODINI ULOŽILI SMO 8,1 MILION KM U INFRASTRUKTURU



Za općinu Hadžići 2019. godina bila je izuzetno uspješna. Puno toga se radilo u ovoj lokalnoj zajednici u svim segmentima, a posebno u oblasti infrastrukture. Međutim, ono na šta su u Općini posebno ponosni, je činjenica da su uspjeli zadržati status jedne od najefikasnijih uprava po pitanju rješavanja predmeta građana. Riješenost iznosi 98 posto, a radi se o preko 35.000 predmeta.

„Po svim segmentima smo ispunili zadane ciljeve, a njih nije bilo malo. Mnogo govori i realizovani Budžet za 2019. od skoro 17 miliona KM. Ovo je najviši realizovani Budžet Općine u novijoj historiji. Taj niz smo uspostavili 2016. godine i iz godine u godinu, takoreći, obaramo vlastite rekorde. Ako ovaj iznos poredimo sa drugim općinama u BiH sa sličnim brojem stanovnika i površinom, mi smo u samom vrhu. U godini koja je za nama puno se radilo. U suštini, mi smo završili grube poslove na našoj općini u pogledu infrastrukture“, ponosno ističe načelnik Općine Hamdo Ejubović.

Na području općine Hadžići u 2019. godini realizovali su se brojni kapitalni projekti izgradnjom sistema vodosnabdijevanja, modernizacijom saobraćajnica te uređenjem

industrijskih zona. Koliko ste uspjeli realizirati vaš Program rada koji ste ponudili Vijeću i građanima?

„Hvala Bogu na ovom vremenu, kakvo nam je podario u oktobru i što se produžilo ljeto i u jesen tako da su građevinci mogli uraditi jako puno posla. Završili smo rekonstrukciju puta od novoizgrađenog kružnog toka do Donjih Hadžića, staru magistralu Resnik – Osenik, izgradnju komunikacije Binježevo – Miševići, rekonstrukciju puta Žunovnica – Kasatići, putnu komunikaciju Tarčin – Gornja Bioča te staru magistralu kroz Gradac. Teško bi bilo pobrojati sve manje projekte koji su rađeni po skoro svim mjesnim zajednicama. Njih i ne spominjem zato što im je investiciona vrijednost ispod 200. 000 KM, ali završeni su i dati na upotrebu našim građanima, što im je u mnogome olakšalo uslove života. Kada sve saberemo u 2019. godini smo uložili 8,1 milion KM u infrastrukturu“, naveo je načelnik.

Zajedno sa Cestama FBiH isprojektovali ste još jedan kružni tok na ulazu u Hadžiće sa M-17, a završili ste i projekat boljeg izlaza sa M-17 za Mjesnu zajednicu Trzanj. Šta možemo očekivati u 2020. godini?

„Tako je. Završili smo projektnu dokumentaciju za novi kružni tok. Gradit će se na ulazu u Hadžiće sa M-17. Tu je i novo saobraćajno rješnje skretanja sa M-17 za Lokve, izgradnja novog mosta i rekonstrukcija postojeće saobraćajnice do kasarne Krupa. U fazi projektovanja je izgradnja Centra za ekonomsko osnaživanje i mentalnu rehabilitaciju žena Hadžići. Taj objekat će se izgraditi u centru



Hadžića, nadomak zgrade policije. Pokrenuli smo proceduru projektovanja velike moderne kotlovnice na principu toplotnih pumpi koja će zagrijavati KSIRC, streljanu ispod stadiona OŠ „6. mart“ te zatvoreni bazen koji ćemo izgraditi u skladu sa RP Hadžići. Dakle, za ovo smo već obezbijedili 1 milion KM, a čitav projekat će koštati 2,5 miliona KM. Mi ovim završavamo grube poslove i prelazimo na uljepšavanje naše lokalne zajednice, ističe Ejubović.

Svjedoci smo da Sarajevo i sve općine Kantona imaju problem sa nedostatkom čiste pitke vode, a samim time i sa urednim vodosnabdijevanjem. Ovoga problema nije pošteđena ni općina Hadžići. Izvorište „Krupa“ prilikom obilnijih padavina bude zamućeno. Šta se radi po ovome pitanju?

„Vodosnabdijevanje u vrhu je liste naših prioriteta. S tim u vezi izgradili smo dva rezervoara velikog kapaciteta na Lokvama. Čitav sistem potisnih i povratnih cjevovoda, dug 2,2 kilometra, prihvatat će vodu iz Krupe i distribuirati je za Lokve, Crepljane i Kasatiće. U isto vrijeme izgradili smo rezervoar velikog kapaciteta na Barama, a zajedno s tim i potisno-povratne cjevovode od Garovaca do

Bara. Na prvi pogled čini se da raspoređujemo već postojeće kapacitete vode, međutim svi ovi sistemi bit će snabdjeveni novim količinama pitke vode. Tu prije svega mislim na izvorište kod KSIRC-a koje ima ogromni potencijal od 50l po sekundi. Nastavit će se i sa ispitivanjem i pronalaskom novih količina pitke vode kroz testne bušotine“, govori Ejubović.

Popunjava se Industrijska zona Hadžići. Nedavno ste potpisali ugovor za tvornicu keksa. Tamo je ostalo još malo prostora?

„Nije malo, moram kazati da je ovo jako velika zona i da na njoj po regulacionom planu ima 21 lokacija za gradnju privrednih objekata. Do sada su prodate četiri, što znači da imamo još 17 različitih veličina. Ovo je zona koja je najopremljenija u Kantonu Sarajevo, ima sve što je potrebno za industriju, dobru struju, plin, vodu, kanalizaciju, ptt veze, komunikacije su blizu, željeznička pruga je blizu. Oni koji žele da investiraju u prerađivačke kapacitete i industriju, kad sve obiđu onda dođu ovdje. Do 2008. godine bilo je većeg interesovanja za ulaganje u privredu i od tada bilježi se silazna putanja. U ovoj godini investicije se polahko bude i kod nas i na drugim mjestima. Nadam





se da će se i ova naša zona jako brzo popuniti. Član sam Savjeta za strane investicije FBiH i znam po izvještajima sa svih općina Federacije koliko se investira u proizvodnju i vidim da to nije puno. Najviša ulaganja su u stanogradnju i hotelijerstvo, ali se nadam da će u proizvodnju biti više“, kaže načelnik.

Načelnice, koliko je blizu ostvarenje ideje da općina Hadžići bude eko općina. Izgradili ste brojne kanalizacione sisteme. Nema naselja bez kanalizacije ili barem glavnog fekalnog kolektora, izuzev Tarčina?

„Tarčin je specifičan samim tim što vode sa tog područja nije moguće povezati na glavni kolektor Resnik-Hadžići i dalje prema Butilama. Potrebna su velika finansijska sredstva za prečistače koje ćemo graditi na rijeci Bijeloj. Svako mjesto na području općine je u mogućnosti da kućni i ostali otpad odlaže tamo gdje je propisano. Tamo gdje ne mogu veliki kamioni, idu mali, čak i otpad koji je selektivan probamo nekim pilot projektima riješiti, sa crnim i žutim kantama gdje se odvajaju otpadi različitih vrsta. Da bi postali eko općina

potrebno je da se provede politika, makar na nivou Kantona Sarajevo, ili na nivou države, koja će snažnije pokrenuti akciju zaštite okoline i sa propagandom i sa propisima da bismo mi nešto tako mogli primijeniti. Možemo donijeti odluke, ali ako ih ne prate propisi kojima je moguće sankcionisati one koji se ne pridržavaju tih propisa, onda ih je bespotrebno donositi. Sad za sad, to je jako teško provodljivo, obzirom da ni prekršajni nalozi nisu u funkciji, tako da naš inspektor na licu mjesta ne može kazniti nekoga ko iz auta baci smeće kraj puta jer nema registra tih prekršajnih naloga“.





Asfaltiran put BINJEŽEVO-MIŠEVIĆI

Radnici Kantonalnog javnog komunalnog preduzeća "Rad" Sarajevo okončali su radove rekonstrukcije i asfaltiranja saobraćajnice Binježevo-Miševići ukupne dužine 800 metara. Izgrađena je moderna petmetarska saobraćajnica sa jednostranom pješačkom stazom širine 90 cm. Odvodnja oborinskih voda riješena je izgradnjom oborinske kanalizacije sa slivničkim rešetkama. Izgrađen je i veliki broj zahtjevnih betonskih

zidova i podzida. Paralelno sa ovim radovima završeni su poslovi izgradnje fekalnog kolektora, gasovoda i izmještanje stubova ulične rasvjete. Radove na projektu izvodilo je preduzeće KJKP "Rad" Sarajevo, a finansirali Općina Hadžići, Direkcija za puteve KS i Ministarstvo saobraćaja KS. Nadzor nad izvođenjem radova vršio je "Arting BH" Sarajevo.



Asfaltiran put ŽUNOVNICA-KASATIĆI

Završena je rekonstrukcija i asfaltiranje puta Žunovnica-Kasatići ukupne dužine 1200 metara. Širina asfaltne kolovozne trake iznosi četiri metra. Na pojedinim mjestima ta širina iznosi tri metra jer nije bilo moguće ispratiti projekat. Odvodnja oborinskih voda riješena je izgradnjom rigola, drenaža i upojnih bunara.

Također na ovoj zahtjevnoj dionici urađen je veći broj potpornih zidova radi stabilizacije puta i okolnog terena. Radove su finansirali Općina Hadžići i Direkcija za puteve KS, a nadzor nad izvođenjem radova vršio je Zavod za planiranje KS. Preduzeće Bucomerc d.o.o Kiseljak ove poslove je okončalo u zadanom roku.





Asfaltirana stara magistrala kroz naselje Gradac

Radnici preduzeća “Bosman” sredinom oktobra 2019. godine okončali su radove asfaltiranja stare magistrale kroz Gradac ukupne dužine 1800 metara. Širina asfaltne kolovozne trake je šest metara. Asfaltirana je i uređena

jednostrana pješačka staza te pristupni putevi pojedinačnim stambenim objektima duž trase puta. Odvodnja oborinskih voda riješena je izgradnjom oborinske kanalizacija i drenaža



Okončana rekonstrukcija puta RESNIK – KAZINA BARA

Preduzeće “Sarajevoputevi” okončalo je radove rekonstrukcije i asfaltiranja putne komunikacije Resnik-Kazina Bara, stara magistralna cesta, ukupne dužine 1700 metara. Širina asfaltnog kolovoza iznosi 5,5 metara.

Odvodnja oborinskih voda riješena je sistemom rigola i jaraka. Postavljena je horizontalna i vertikalna saobraćajna signalizacija. Projekat su finansirali Općina Hadžići, Direkcija za puteve KS i Ministarstvo saobraćaja KS.





Asfaltiran put Donja Bioča – Gornja Bioča

Radnici preduzeća Bucomerc d.o.o Kiseljak sredinom juna 2019. godine okončali su radove rekonstrukcije i asfaltiranja dijela putne komunikacije Donja Bioča (prijeki put) - Gornja Bioča (do mosta prema Mehinoj Luci). Na ovaj način okončan je projekat započet u 2018. godini,

a u konačnici građani su dobili skoro 3.000 metara moderne putne komunikacije širine pet metara. Također, na dionici je ugrađen kolektor fekalne kanalizacije. U narednoj građevinskoj sezoni prisutpit će se rekonstrukciji i asfaltiranju dionice prema Mehinoj Luci na dužini od cca 250 metara.



Asfaltirana ulica Zlatnih ljiljana

Radnici preduzeća Bucomerc d.o.o Kiseljak okončali su radove rekonstrukcije i asfaltiranja ulice Zlatnih ljiljana u centru Hadžića, od kružnog toka prema Privrednoj zoni Hadžići do uključnja na magistralni put M-17. Širina asfaltne kolovozne trake iznosi sedam metara sa

obostranom pješačkom stazom. Ulica je obilježena horizontalnom i vertikalnom saobraćajnom signalizacijom. Uređena je pješačka staza kroz park prema naselju Barake i Sutice te dio pješačke staze kroz drvodred prema Privrednoj zoni Hadžići.





Asfaltiran put OSENİK-KAPUČA



Javno komunalno preduzeće „Komunalac“ Hadžići okončalo je radove rekonstrukcije i asfaltiranja putne komunikacije Osenik – Kapuča na dužini od 400 metara. Širina asfaltne kolovozne trake je 4,50 metra. U sklopu rekonstrukcije izvršeno je ravnanje, nasipanje i tamponiranje preostalog dijela puta Kapuča – M17 kao i čišćenje odvodnih kanala za prihvrat oborinskih voda. Radove je finansirala Općina Hadžići.

Asfaltirana ulica DONJI HADŽIĆI – IZA PRUGE



Javno komunalno preduzeće „Komunalac“ Hadžići okončalo je radove rekonstrukcije i asfaltiranja dijela ulice Donji Hadžići – Iza pruge (spoj Zlatnih ljiljana i Ušivaka). Širina asfaltne kolovozne trake iznosi 5,5 metara, a dužina 520 metara. Ovu ulicu je bilo neophodno rekonstruisati s obzirom da su nastale veće štete prilikom izgradnje distributivne gasne mreže Igman – Hadžići. Radove su finansirali Općina Hadžići i Direkcija za puteve KS. Nadzor nad izvođenjem radova vršio je “Arting BH” Sarajevo.

Sanacija puta PREMA INDUSTRIJSKOJ ZONI BOCE



Općina Hadžići je zbog velikih oštećenja na pristupnom putu prema Industrijskoj zoni Boce, te problema oborinskih voda, sanacirala navedeni put (nasipanje, nivelisanje i asfaltiranje). Novim rješenjem voda sa saobraćajnice prikupljat će se i odvesti PVC cijevima fi 400 u korito rijeke Zujevine, a kao alternativno rješenje će biti potopna puma u RO sa pjeskolovom. Nakon sanacije puta i rješavanja oborinske vode pristup Industrijskoj zoni Boci znatno je poboljšana i olakšana svim motornim vozilima. Radove je izvodilo preduzeće JKP „Komunalac“ Hadžići.



FK Radnik U 2019. godini investirano 460.000 KM U INFRASTRUKTURU

Nakon 11 godina korištenja, umjetna trava na sportskom terenu Fudbalskog kluba Radnik Hadžići zamijenjena je, a sam teren proširen na dimenzije 105×67 metara. Pored proširenja terena i zamjene umjetne trave postavljena je zaštitna ograda. Instalirani su napojni kablovi i urađeni temelji za ugradnju reflektora. Radovi su rezultat partnerskog odnosa Evropske fudbalske federacije (UEFA), Fudbalskog saveza BiH i Općine Hadžići. Radi se o unaprjeđenju infrastrukture za razvoj omladinskog fudbala. Općina Hadžići je izdvojila 200.000 KM, a Fudbalski savez BiH putem UEFA-e 260.000 KM. Tim povodom FK Radnik posjetili su Općinski načelnik Hamdo Ejubović i jedan od najuspješnijih bh. menadžera Irfan Redžepagić, koji u svojoj agenciji ima i najboljeg igrača BiH Edina Džeku.

“Imao sam jako lijepo iskustvo saradjujući sa Radnikom svih ovih godina. Ispunili smo određene planove, mnogo radili na infrastrukturi,

organizovali veliki broj dječaka koji su došli trenirati i igrati za Radnik, a danas nastupaju u drugim klubovima i imaju svoje karijere. Sada imamo bolje temelje i želimo napraviti neke nove klince koji će ostvariti još bolje rezultate. Prvi korak na tom putu bio je dovođenje Mensura Dogana, najboljeg stručnjaka u BiH za rad sa mladima”, kazao je Redžepagić zahvalivši se posebno načelniku Hamdi Ejuboviću.





Svečano otvoreno sportsko igralište na Ban brdu

Načelnik Općine Hadžići g. Hamdo Ejubović i predsjednik Savjeta mjesne zajednice Hadžići g. Ahmo Suljić svečanim presjecanjem vrpce predali su građanima naselja Ban brdo na upotrebu novoizgrađeno sportsko igralište koje će nositi naziv "11. maj". Igralište se sastoji od terena za fudbal dimenzija 40×20 metara te terena za basket dimenzija 19×19 metara. Članovi najmlađih selekcija Fudbalskog kluba

Radnik Hadžići imali su čast da otvore sportsko igralište revijalnom utakmicom. Imam Centralne džamije Hadžići hafiz Hašim-ef. Zahirović proučio je zajedno sa građanima Ban brda hair dovu. Projekat je finansirala Općina Hadžići uz podršku Ministarstva civilnih poslova Bosne i Hercegovine. Radove je izvelo preduzeće "Music Company" Hadžići. Nadzor nad izvođenjem radova vršio je „Arting BiH“ d.o.o. Sarajevo.



SPORTSKO IGRALIŠTE U GORNJEM ZOVIKU DOBILO TRIBINE

Radnici preduzeća "Music Company" Hadžići Rokončali su radove izgradnje tribina na sportskom igralištu Gornji Zovik. Asfaltiran je i pristupni put. Općina Hadžići nastavlja s

utvrđenim programom izgradnje sportskih terena u svim mjesnim zajednicama, a sljedeći korak je izgradnja sportske plohe u Donjim Hadžićima.





Sala za vjenčanje u novom ruhu

Sklapanje braka je svečani čin stoga i ambijent gdje se vrši sklapanje braka treba da bude svečan i svečarskog karaktera. Općinska sala za vjenčanja u ulici Hadželi na broju 61, u potpuno novom ruhu, dočekuje mladence. U mnogo ljepšem i prijatnijem ambijentu, budući supružnici će izgovarati “sudbonosno da”, a i

matičari će imati mnogo bolje uslove za obavljanje čina vjenčanja. Prema podacima Službe za opću upravu, društvene djelatnosti i zajedničke poslove, sala je u potpunosti renovirana, klimatizirana, adekvatno osvijetljena te je postavljena pozadina za vjenčanja.



Zajednička saradnja Općine i građana Zamjena krova i postavljanje fasade na stambenoj zgradi

Uspješna zajednička saradnja Općine Hadžići i građana realizovana je u Mjesnoj zajednici Žunovnica u Ulici Igmanska na brijevima 8,12 i 14. Naime, građani i Općina su

zajedno prikupili 138.000 KM kako bi finansirali zamjenu krova i postavljanje toplotne fasade na stambenoj zgradi. Radove je izvodilo preduzeće Sela d.o.o. Sarajevo.





Distributivna gasna mreža Igman-Hadžići

Načelnik Općine Hadžići Hamdo Ejubović, ministar komunalne privrede i infrastrukture Kantona Sarajevo Srđan Mandić i tadašnja direktorica Sarajevogasa Nihada Glamoč, 13. septembra pustili su u pogon distributivnu gasnu mrežu Igman-Hadžići u dužini od 16 kilometara. Time je svečano realizovan projekt "Uvezivanje gasnog prstena

pritiska 3(4) bar na dionici Igman – Hadžići". Ovim spajanjem ispunjen je važan cilj da su općine Hadžići i Trnovo dobile napajanje gasom iz dva pravca. Kreirani su svi preduslovi za nesmetano korištenje gasa na području Ilidže, Hadžića i Trnova. Tehničko održavanje gasovoda je moguće bez obustave isporuke prirodnog gasa. Vrijednost projekta iznosi 2,3 miliona KM.



MZ Grivići Postavljeni usporivači brzine

Na osnovu zahtjeva grupe građana Mjesne zajednice Grivići, Općina Hadžići je realizovala projekat postavljanja tri usporivača brzine s ciljem umirivanja saobraćaja u najprometnijem dijelu ovog naselja. Također je

postavljena i vertikalna signalizacija koja sve učesnike u saobraćaju obavezuje na dodatni oprez, s obzirom da su vozila na ovoj dionici često izljetala sa kolovozne trake. Radove je izvelo preduzeće JKP „Komunalac“ Hadžići.





U Hadžićima, Pazariću i Tarčinu postavljene niše za kontejnere

Novo niše za kontejnere izgrađene su na 12 lokacija u Tarčinu i Pazariću na devet lokacija, a u Hadžićima je predviđeno 16 lokacija. Broj posuda je različit u zavisnosti od potreba stanovništva, što utvrđuje firma KJKP "Rad" Sarajevo. Obzirom da su natkrivene niše na prostoru Kantona Sarajevo otvorenog tipa, psima i drugim životinjama omogućen je pristup kontejnerima, odnosno otpadu, te je zbog toga prostor oko niša

obično neuredan. Zbog toga se Općina Hadžići odlučila za idejno rješenje za izgradnju natkrivenih niša sa dvokrilnim vratima na prednjoj strani niše, što će životinjama onemogućiti raznošenje smeća. Izgradnja kontejnerskih niša počela je i u užem području Hadžića. Izvođač radova je preduzeće "Music Company" Hadžići, a realizaciju projekta u vrijednosti od 100.000 KM finansira Općina Hadžići.



Renovirane prostorije Udruženja Organizacije porodica šehida i poginulih boraca Općine Hadžići

Udruženje Organizacije porodica šehida i poginulih boraca Općine Hadžići od februara 2019. godine radi u dobro opremljenim prostorijama na broju 64 u ulici Hadželi. Naime, Općina Hadžići je izdvojila 7.000 KM za projekat rekonstrukcije i opremanja.

"U ime svih članova Udruženja porodica šehida

i poginulih boraca zahvaljujem se načelniku Ejuboviću. On je uvijek uz nas i u svakom momentu ima razumjevanja za naše potrebe. Sada imamo prostorije dostojne čovjeka i ugodne za rad", kazao je član Upravnog odbora Udruženja Asim Nikšić, otac šehida Rusmira Nikšića.





Osnovna škola „6. mart“ Hadžići

Zamjenjen krov, stolarija i postavljena toplotna fasada



Zamjenom starog salonitnog krova, postavljanjem toplotne fasade i zamjenom vanjske stolarije okončan je projekat poboljšanja energetske efikasnosti u Osnovnoj školi „6. mart“ Hadžići. Radove su finansirali Općina Hadžići i Ministarstvo za obrazovanje, nauku i mlade Kantona Sarajevo. Izvođač radova bila je firma Inter-Com d.o.o Zenica. Općina Hadžići i Ministarstvo obrazovanja su u decembru 2018. godine potpisali sporazum o finansiranju i sufinansiranju ovih poslova. Radovi su koštali 510.000 KM. Općina Hadžići ni ovaj put nije

propustila priliku da inicira ili finansira sve projekte koji se odnose na poboljšanje uslova rada u našim obrazovno-odgojnim ustanovama. U Osnovnoj školi „6. mart“ finansirana je izgradnja zaštitne ograde oko dvorišta škole, rekonstrukcija sportskog terena i tribina stadiona, rekonstrukcija kanalizacione mreže, sanacija prostora atrija škole, zamjena vanjske stolarije, kupovina razglasa za atrij škole, kupovina instrumenata i opremanje kabineta muzičke škole, rekonstrukcija fiskulturne sale i izgradnja dodatne manje itd.





Osnovna škola „Hilmi ef. Šarić“ Tarčin energetska efikasna

Početkom septembra 2019. godine okončan je projekt povećanja energetske efikasnosti u Osnovnoj školi „Hilmi ef. Šarić“ Tarčin. Urađena je termoizolaciona fasada na objektu škole, zamijenjena dotrajala vanjska stolarija, ugrađen kotao na pelet jačine 300 kW te su ugrađeni termostatski ventili na sve radijatore u školi. Općina Hadžići je ovaj projekat sufinansirala sa 71.000 KM, a provela ga je kancelarija UNDP-a BiH.



Izgrađen rezervoar pitke vode velikog kapaciteta u naselju Bare

Na lokalitetu Bara završena je gradnja rezervoara pitke vode kapaciteta 250 m³ čime je značajno poboljšan sistem vodosnabdijevanja općine Hadžići i samog naselja Bare. Radove je izvodilo preduzeće „Vizija“ d.o.o. Visoko. Radnici

JKP „Komunalac“ Hadžići u isto vrijeme privode kraju izgradnju potisnih cjevovoda Garovci-Bare. Radove finansiraju Općina Hadžići i Ministarstvo komunalne privrede i infrastrukture Kantona Sarajevo.





Vodosnabdijevanje na vrhu liste prioriteta Općine Hadžići



Građevinska sezona na području naše Općine počela je realizacijom kapitalnih infrastrukturnih projekata. Pored onih iz oblasti saobraćaja u fokusu je vodosnabdijevanje. U toku je izgradnja vodovodnog sistema za Lokve, Crepljane i Kasatiće. Izgradnjom dva nova rezervoara kapaciteta 250 m³ vodosnabdijevanje naselja Lokve, Crepljani i Kasatići neće više biti ugroženo. Radi se o složenom sistemu kojim se voda uzima sa izvorišta Krupa i sistemom pumpi dovodi u rezervoare, a do korisnika će dolaziti slobodnim padom. Trasa je duga 2,2 kilometra. Do sada je okončano 1,2 kilometra potisnih i prelivnih cjevovoda. Radove izvodi preduzeće „Bujice“

d.o.o. Konjic. Nadzor nad izvođenjem radova vrši Zavod za izgradnju KS, a finansira Općina Hadžići i Ministarstvo komunalne privrede i infrastrukture Kantona Sarajevo. Vode će biti dovoljno za 4.000 stanovnika ovih naselja te za potrebe turističkog naselja u Crepljanima. S ciljem rješavanja problema nedostatka vode i zamucenja glavnih izvorišta sa kojih se pitkom vodom snabdijevaju građani općine Hadžići, JKP „Komunalac“ Hadžići dobio je nalog da ispita nekoliko potencijalnih lokacija sa novim količinama vode. Također, radi se i na uključivanju u sistem vodosnabdijevanja novog izvorišta pitke vode pronađenog u blizini KSIRC-a čiji je kapacitet 50 litara po sekundi.





Obezbijedeno 123.984 KM za regulaciju vodotoka na području općine Hadžići



Načelnik Općine Hadžići g. Hamdo Ejubović potpisao je 12. jula 2019. godine


sporazum o sufinansiranju projekata regulacije vodotoka na području općine Hadžići sa direktorima Kantonalne uprave civilne zaštite i Zavoda za izgradnju KS Samirom Džihićem i Mirzom Hulusićem. Radi se o projektima regulacije i uređenja korita potoka Resnik u Pazariću. Za ovu namjenu Kantonalna uprava civilne zaštite izdvojila je 123.984 KM. Nadzor nad realizacijom projekata vršit će Zavod za izgradnju KS.

Za javnu rasvjetu obezbijedeno 38.000 KM



Načelnik Općine Hadžići Hamdo Ejubović i ministar komunalne privrede i infrastrukture Kantona Sarajevo Srđan Mandić potpisali su 17. septembra u Hadžićima Sporazum o sufinansiranju realizacije projekta proširenja Javne rasvjete na području općine Hadžići vrijedan 38.800,00 KM. Javna rasvjeta će se proširiti u naseljima Dupovci, Ušivak-Marilovići, Musići-Nišani te prema JU OŠ „6. mart“ Hadžići. Stare sijalice mijenjaju se novim LED u ulici Hadželi.

U izgradnju javne rasvjete u 2019. godini uloženo 170.000 KM



U projekat izgradnje, rekonstrukcije i sanacije javne rasvjete u 2019. godini Općina

Hadžići je uložila 170.000 KM. U Službi za razvoj, stambeno-komunalne poslove sačinili su spisak lokacija na kojima je rasvjeta postavljena: Raštelića-proširenje, Tarčin-Vilovačka, Tarčin-9. BRDSKE BRIGADE, Suhodol-Medvjedice, Osenik-Kapuča, Stara cesta M17-Beganova ravan, Raskrsnica Osenik-Kazina Bara, Ramići, Ramići-proširenje, Miševići-Grabova, Ban brdo, Ban brdo-proširenje, Grivići, Tinohovska ulica-nastavak, Milinjača-proširenje, Ušivak-Bjelotine, Vrančići-novo naselje.



Ejubović i Šteta potpisali sporazume vrijedne 850.000 KM

Načelnik Općine Hadžići g. Hamdo Ejubović i ministar saobraćaja Kantona Sarajevo g. Adnan Šteta potpisali su 25. oktobra u Hadžićima dva sporazuma o sufinansiranju realizacije infrastrukturnih projekata ukupne vrijednosti 850.000 KM. Prvi sporazum se odnosi na izvođenje radova unaprjeđenja putne infrastrukture sa parkingom na području Privredne zone Hadžići. Procijenjena vrijednost radova iznosi 650.000 KM. Ove poslove

Ministarstvo saobraćaja KS će sufinansirati sa 250.000 KM, a ostatak sredstava će obezbijediti Općina Hadžići. Drugi sporazum se odnosi na izvođenje radova na revitalizaciji horizontalne i vertikalne siganlizacije puteva na području općine Hadžići. Procijenjena vrijednost radova iznosi 200.000 KM. Ministarstvo saobraćaja će izdvojiti 100.000 KM, a Općina Hadžići također 100.000 KM.



REGULISANO KORITO RIJEKE ZUJEVINE U KAHRIMANIMA

UMjesnoj zajednici Pazarić, naselje Kahrimani, okončani su radovi regulacije korita rijeke Zujevine ukupne dužine 238 metara. Projekat je započet u 2018. godini s ciljem zaštite ovog područja od plavljenja i zaštite lokalnog mezarja. Cijelom dužinom regulacije izgrađeno

je betonsko korito „U“ profila. Regulisano korito na ovoj dionici dimenzionirano je da prihvati i transportuje veliku vodu ranga pojave „jednom u sto godina“, sa zaštitnim nadvišenjem od 80 cm. radove je izvelo preduzeće OD “Pogled” Hadžići.





Pazarić: Regulacija korita rijeke Zujevine na dužini od 920 metara

Zbog višegodišnjeg problema plavljenja i nanošenja materijalne štete na poljoprivrednim dobrima i stambenim objektima građana naselja Pazarić, započeli su radovi na čišćenju riječnog korita rijeke Zujevine. Radnici



preduzeća OD "Pogled" Hadžići trenutno vrše prokresivanje, rezanje stabala i vađenje panjeva, produbljuju i proširuju riječno korito od magistralnog puta M-17 prema centru Paziraća ukupne dužine 920 metara.



Regulacija potoka Resnik u Pazariću

Završeni su radovi na regulaciji potoka Resnik u dužini od 84,80 m u Pazariću. Kako ovaj potok protiče kroz gusto naseljeno područje njegovo korito je izvedeno od ab



zidova „U“ profila. Širina korita je 2,5 m a visina ab zidova 1,8 m. Korito ovog potoka je dimenzionirano na stogodišnje velike vode.



Regulacija Zujevine u centru Hadžića



Početkom decembra započeli su radovi na nastavku regulacije korita rijeke Zujevine u

centru Hadžića. U ovoj fazi predviđeni su radovi na izgradnji armirano betonske kaskade u koritu rijeke pozicionirane 42 m uzvodno od postojećeg mosta. Izvest će se betoniranje i spuštanje dna korita u dužini od od cca 74 m uzvodno i nizvodno od mosta. Nizvodno od mosta sa lijeve strane obale izvodi ab oblaganje kosine u dužini od L=20 m a sa desne obale izvodi se ab zid u dužini od 5 m.



Za Privrednu zonu Hadžići obezbijeđeno 591.250 KM



Za projekte izgradnje vodovodne i fekalne kanalizacione mreže te izgradnju oborinske kanalizacije u Privrednoj zoni Hadžići obezbijeđeno je 591.250 KM. Ova sredstva su odobrena Programom raspodjele finansijskih sredstava za infrastrukturno uređenje i rješavanje imovinsko-pravnih odnosa u privrednim

i poslovno industrijskim zonama Kantona Sarajevo za 2019. godinu. Odobrenih 591.250 KM je dobro došao novac s obzirom da je potrebno 4,5 miliona KM za potpuno opremanje Privredne zone Hadžići. Općina Hadžići je posredstvom nadležnih ministarstva do kraja 2019. u ovu industrijsku zonu uložila 1,7 milion KM.





Preduzeće „Tako“ otvara proizvodni pogon u Hadžićima

Načelnik Općine Hadžići g. Hamdo Ejubović i direktor „Tako“ d.o.o. Sarajevo g. Benjamin Kasumović potpisali su 21. oktobra 2019. godine u zgradi Općine Hadžići Ugovor o kupoprodaji zemljišta vrijedan 606.900,00 KM. Naime, preduzeće „Tako“ kupilo je od Općine Hadžići dvije lokacije u Privrednoj zoni Hadžići ukupne površine 6.069,00 m². Kupovinom zemljišta „Tako“ je napravio prvi korak ka realizaciji projekta izgradnje i razvoja proizvodnog

pogona u sektoru prehrambene industrije.

„Nova proizvodna hala će zahtijevati i nova radna mjesta. U prvoj fazi razvoja govorimo o 100 novozaposlenih, a ovisno od potreba tržišta, te daljnjeg razvoja brenda rast će i broj zaposlenih. U Hadžićima smo pronašli prostor za potrebe projekta koji je kompozicijom i infrastrukturom odgovorio na sve zahtjeve potrebne za izgradnju funkcionalne proizvodno-poslovne jedinice“ poručili su iz preduzeća „Tako“ d.o.o.



U Hadžićima svečano otvoren logistički centar kompanije Express One



Logistički centar kompanije Express One 28. novembra 2019. godine svečano je otvoren u Industrijskoj zoni Boce – Hadžići. Centar sadrži skladišni i kancelarijski prostor površine

oko 3.000 m², te manipulativni prostor sa parkingom i zelenim površinama od 8.000 m². Express One je lider u oblasti ekspresne dostave paketa širom Bosne i Hercegovine u roku od 24 sata. Njihov strateški investitor sa 100 odsto vlasništva su Austrijske pošte. Davne 1999. godine, počeli su kao mali, lokalni i nepoznati učesnik na tržištu pod imenom 24VIP. Danas su vlasnici osam lokalnih centara širom zemlje (Mostar, Banja Luka, Tuzla, Zenica, Doboj, Brčko, Prijedor, Bihać) sa preko 120 vozila i 210 zaposlenih.





Ramazanski top

Poklon Grada Sarajeva građanima Hadžića



Gradonačelnik Sarajeva Abdulah Skaka poklonio je građanima općine Hadžići ramazanski top, a svečana primopredaja izvršena je krajem aprila 2019. godine na Ban brdu, odakle taj top oglašava vrijeme iftara. Svečanoj primopredaji prisustvovali su gradonačelnik Skaka, načelnik Općine Hadžići Hamdo Ejubović, zastupnik u Parlamentu Federacije BiH Eldar Čomor, predstavnici

Medžlisa Islamske zajednice te vijećnici Općinskog vijeća Hadžići. Ovo je nastavak jedne lijepe tradicije koju je Grad Sarajevo aktuelizirao u posljednjih dvadesetak godina, gdje se kraj posta i početak iftara započinje pucnjem iz topa sa Žute tabije. Načelnik Hadžića gospodin Ejubović se zahvalio na ovom nsvakidašnjem poklonu.



Savremeno opremljeni **ROBOT CENTAR** otvorio svoja vrata u Hadžićima



Kompanija Robot 6. septembra svečano je otvorila novoizgrađeni, savremeno opremljeni hipermarket prehrane i tehnike na površini od 3.000 m² i dvije etaže u Privrednoj zoni Hadžići. Na stotine građana je u prvim satima posjetilo ovaj objekat koji kupcima između ostalog nudi restoran, dječiju igraonu, parking i autopraonicu. U samome startu ova kompanija se pokazala kao društveno odgovorna pa je na ceremoniji otvaranja direktorica grupacije Saima Hodžić uručila novčanu donaciju u iznosu od 5.000 KM našoj sugrađanki Drina Sevidi,

inače osobi lošeg materijalnog stanja. Robot je jedna od vodećih domaćih kompanija u oblasti trgovine na području BiH. Svake godine otvaraju nove poslovnice, a samim tim i nova radna mjesta. U Hadžićima je zaposlenje našlo 60 radnika. Ono što možemo garantovati jeste da će građani Hadžića biti počašćeni novim mjestom najbolje porodične kupovine uz super niske cijene, poručili su iz kompanije Robot.





Dodijeljeno 15 plastenika socijalno ugroženim porodicama



Općina Hadžići i njemačka nevladina organizacija Arbeiter-Samariter-Bund (ASB) dodijelili su 15 plastenika od 75 do 100 m² socijalno ugroženim porodicama naše općine. Ugovore su u zgradi Općine Hadžići 19. juna 2019. godine potpisali načelnik Hamdo Ejubović, predstavnici ASB BiH, predstavnici Centra za socijalni rad Hadžići i aplikanti. Plastenike su dobili: Birdžo Suada, Kalember Nedžad, Hasičić Ekrem, Krčalo Taib, Brdar Ramo, Tabak Ragib, Čiko Ramiza, Pačo Rašida,

Kadrić Mustafa, Avdić Ramiz, Abazović Ešrefa, Nizić Enver, Šerbo Alija, Golubić Ibro i JU „Zavod za zbrinjavanje mentalno invalidne djece i omladine“ Pazarić. Ukupna vrijednost projekta dodjele plastenika iznosi 30.000 KM, od čega je Općina izdvojila 12.000 KM, a ostatak njemačka organizacija. Listu aplikanata je predložio Centar za socijalni rad Hadžići. Ovo je treći projekat koji nevladina organizacija Arbeiter-Samariter-Bund zajednički realizuje sa Općinom Hadžići.





OPĆINA HADŽIĆI I MUSLIM AID DODIJELILI 20 PLASTENIKA

U Općini Hadžići 18. novembra potpisani su ugovori sa korisnicima projekta „Dodjela plastenika socijalno i materijalno ugroženim osobama sa područja općine Hadžići“, koji zajednički realiziraju Općina Hadžići i humanitarne organizacije Muslim Aid Sarajevo i „LDSC“. Radi se o 20 plastenika od 100 metara kvadratnih sa dodatnom opremom Ukupne vrijednosti 49.700 KM. Plastenici su dodijeljeni po principu sufinansiranja, 40

odsto sredstava osigurava Općina, 40 odsto humanitarne organizacije, a 20 odsto sredstava krajnji korisnici. Plastenikom proizvodnjom će se baviti: Hujić Edina, Šahić Ćamil, Zolotić Almir, Bičo Aldina, Gosto Senad, Durmišević Aida, Durgut Sedina, Merdanović Sanela, Ramić Almasa, Smajkan Suvad, Imamović Nasir, Čomor Nusret, Kadrić Zejneba, Vatrić Zejna, Selimović Armela, Alibašić Sadeta, Šarić Melisada, Suljić Ahmo, Marić Meliha i Memić Murveta.



Dom zdravlja Hadžići Laboratorija počela sa radom

Nakon okončanih radova rekonstrukcije prostorija, Služba za laboratorijsku dijagnostiku Doma zdravlja Hadžići od 21. januara 2019. godine radi na staroj adresi. Općina Hadžići je u ovaj projekat investirala 65.000 KM te na taj način dodatno poboljšala kvalitet zdravstvenih usluga građanima. Općina je finansirala građevinske radove rekonstrukcije

i nabavku namještaja. Laboratorijska služba Doma zdravlja Hadžići u prosjeku po danu prima 60 pacijenata. Ukoliko bi laboratorija bila opremljena adekvatnom opremom i tehnologijom građani bi u našoj zdravstvenoj ustanovi mogli dati uzorke urina i krvi te u istom danu dobiti adekvatne nalaze.





OPĆINA HADŽIĆI SA 37.300 KM PODRŽALA PROJEKTE VJERSKIH ZAJEDNICA I CRKAVA

Općina Hadžići je u 2019. godini u Budžetu predvidjela sredstva u iznosu od 40.000 KM za potrebe pomoći vjerskim zajednicama i crkvama koje djeluju na području općine. Od te sume realizovano je 37.300 KM kojima su potpomognute aktivnosti Medžlisa Islamske zajednice Sarajevo, Vrhbosanske nadbiskupije Sarajevo, te Mitropolije dabrobosanske. Novac je utrošen na sanaciju, zaštitu i rekonstrukciju vjerskih objekata, kao i programske aktivnosti vjerskih zajednica. Sredstva su dodijeljena Medžlisu Islamske zajednice Sarajevo te džematima Pazarić, Binježevo, Grivići, Gradac, Tarčin-Vrbanja. Pomoć je pružena Vrhbosanskoj nadbiskupiji, Župnom uredu u Tarčinu za obnovu crkve. Sufinansirana je obnova Crkve na Oseniku koja je dio Srpske pravoslavne crkvene opštine Blažuj. Također, Općina Hadžići izašla je u susret Medžlisu Islamske zajednice Srebrenica gdje je sufinansirala izgradnju džamije u džematu Klotjevac. Medžlis Islamske zajednice Kiseljak pomognut je sa dijelom sredstava za rekonstrukciju mekteba u džematu Duhri. Općina je sufinansirala tradicionalnu Kulturno-vjersku manifestaciju “Dani Hasana Kaimije” u Zvorniku. Također sufinansirane su aktivnosti Tekije Mesudija u Kaćunima i Manifestacija “Selam, ja Resulallah”, koju povodom rođendana Božijeg poslanika Muhammeda a.s. tradicionalno organizira Medžlis Islamske zajednice Sarajevo.





Nabavljeno novo terensko vozilo za potrebe civilne zaštite

U cilju unaprjeđenja rada civilne zaštite načelnik Općine Hadžići g. Hamdo Ejubović uručio je 18. novembra 2019. godine ključeve novog terenskog vozila Toyota Hilux šefu Službe civilne zaštite Općine Hadžići g. Nijazu Musiću. Gospodin Musić se zahvalio

načelniku Ejuboviću istakavši da je na ovaj način ojačan sistem zaštite i spašavanja. Toyota Hilux je savremeni, dobro opremljeni pick-up terenac visoke kvalitete. Vozilo je koštalo 73.000 KM od čega je Općina Centar Sarajevo izdvojila 20.000 KM, a ostatak Općina Hadžići



POMOĆ ZA UNIŠTENE MALINJAKE U IZNOSU OD 22.000 KM

Na osnovu Odluke o kriterijima sredstava iz Budžeta Općine Hadžići podrška poljoprivredi i Odluke Općinskog je jednokratna novčana pomoć za 26 šteta na zasadima malina u iznosu od 22.000 KM. Područje Tarčina zahvatilo je nezapamćeno nevrijeme praćeno jakim kišom, vjetrom i gradom što je između ostalog prouzrokovalo velike štete na zasadima malina. Za svaki dunum uništenog zasada maline Općina Hadžići je uplatila vlasnicima iznos od 500 KM.

za raspodjelu za 2019. godinu načelnika dodijeljena podonosilaca prijava Početkom jula ove godine



Obezbijeđeno 20.000 KM za regulaciju Zujevine u Pazariću

Načelnik Općine Hadžići g. Hamdo Ejubović i načelnik Općine Centar Sarajevo g. Nedžad Ajnadžić potpisali su 4. decembra 2019. godine u Sarajevu ugovor o dodjeli finansijskih sredstava Općini Hadžići za finansiranje regulacije rijeke Zujevine. Potpisnici ugovora su saglasni da Općina Centar u roku od pet dana od dana potpisivanja istog izvrši transfer

sredstava u iznosu od 20.000,00 KM na račun budžeta Općine Hadžići. Pomoć će se realizovati iz budžeta Općine Centar za 2019. godinu sa ekonomskog koda „Pomoć općinama u BiH stradalim poplavama u 2019. godini“. Ovaj novac će se utrošiti za regulaciju rijeke Zujevine u Pazariću.



Općina Novo Sarajevo donirala 10.000 KM za sanaciju šteta od poplava

Načelnik Općine Novo Sarajevo Nedžad Koldžo i načelnik Općine Hadžići Hamdo Ejubović potpisali su 2. aprila u Hadžićima ugovor o korištenju dodijeljenih sredstava u iznosu od 10.000 KM za sanaciju štete nastale

usljed intenzivnih kišnih padavina koje su dovele do ugrožavanja stambenih i pomoćnih objekata i poljoprivrednog zemljišta u općini Hadžići. Dodijeljena sredstva će se utrošiti na području Mjesne zajednice Pazarić.





Zborovanje lovaca LD „Bjelašnica“ Hadžići

U subotu, 8. juna 2019. godine u Društvenom domu Pazarić održano je zborovanje lovaca Lovačkog društva „Bjelašnica“ Hadžići, a u povodu otvorenja lova na srndača. Tom prilikom dodijeljena su savezna odlikovanja i priznanja zaslužnim članovima Društva. Posebno priznanje za doprinos razvoju lovstva na području općine Hadžići dobio je načelnik Hamdo Ejubović. Ovo Lovačko društvo ima višegodišnju tradiciju. Broji preko 350 članova. Od toga je 27 počasnih.

“Od zadataka koje smo uradili u periodu od zadnjeg zborovanja mogu napomenuti da smo zajedno sa Općinom Hadžići sufinansirali adaptaciju i popravku pojedinih lovačkih kuća i tu se posebno zahvaljujemo načelniku Ejuboviću. Također, u radni odnos smo primili i lovočuvara koji svoj posao radi zaista korektno i profesionalno”, kazao je predsjednik LD „Bjelašnica“ Hadžići Mirsad Medić.





Dodijeljeni ugovori za projekte mladih 2019

Svečana dodjela ugovora za projekte mladih za 2019. godinu upriličena je 18. jula 2019. godine u zgradi Općine Hadžići. Ugovore sa prvom grupom od ukupno 25 aplikantata koji

su zadovoljili kriterije Komisije po objavljenom Javnom pozivu potpisao je načelnik g. Hamdo Ejubović. Za ovu namjenu iz budžeta Općine Hadžići potrošit će se 35.000 KM.



STUDENTI MAŠINSKOG FAKULTETA SARAJEVO TREĆI NA "MAŠINIJADI 2019"



Predstavnici Vijeća studenata "Mašinar" sa Mašinskog fakulteta Univerziteta u Sarajevu posjetili su 11. juna 2019. godine Općinu

Hadžići i načelnika g. Hamdu Ejubovića te mu tom prilikom uručili zahvalnicu za nesebičnu podršku i sufinansiranje odlaska naših studenata na 59. po redu Mašinijadu koja je održana u Bečićima u Crnoj Gori. Na ovogodišnjoj Mašinijadi je učestvovalo ukupno 13 fakulteta iz regiona, a Mašinski fakultet Sarajevo je, zauzevši treće mjesto u ukupnom plasmanu, najbolje plasiran bh. fakultet. Trud i zalaganje studenata rezultirali su kolosalnim uspjehom koji je svojevrsan pokazatelj da Mašinski fakultet Sarajevo s pravom uživa status jednog od najboljih fakulteta iz ove oblasti u regionu.



Donacija knjiga za školske knjižoteke u Tarčinu i Pazariću

Općinski načelnik Hamdo Ejubović donirao je školskim knjižotekama po 55 naslova iz edicije Bošnjačka književnost u 100 knjiga. Riječ je o ediciji zasnovanoj 1995. godine kao nastojanju da se predstave najreprezentativnija djela bošnjačke književnosti, od usmene, preko starije

pa sve do savremene produkcije u književnom životu Bošnjaka. Najznačajniji je to projekt u vezi s bošnjačkom književnošću, a predstavlja i svojevrsni ekvivalent sličnim projektima u bosanskohercegovačkom susjedstvu, ali i u Evropi.



Ruksaci i školski pribor za sve prvačiće



Na području općine Hadžići u školskoj 2019/2020. godini u prvi razred je krenulo 247 đaka koji će nastavu pohađati u četiri osnovne škole: OŠ “6. mart” Hadžići, OŠ “Hadžići” Hadžići, OŠ “9. maj” Pazarić i OŠ “Hilmi ef. Šarić” Tarčin. Ukupan broj učenika u ove četiri škole je 2215. Za sve prvačiće Općina Hadžići, na čelu sa načelnikom g. Hamdom Ejubovićem, i ove godine je obezbijedila besplatne ruksake i školski pribor. U Kanonu Sarajevo u osnovne škole upisano je 37.020, a u srednje 15.255 učenika.





Kulturna tradicija „Poklon knjiga za peticu“



Ove godine Općina Hadžići je realizovala kulturni projekt „Poklon knjiga za peticu“

čiji je cilj nagraditi knjigom svakog odličnog učenika osnovnih škola sa područja naše općine. Za odličan uspjeh i primjereno vladanje u školskoj 2018./2019. godini poklon knjigom nagrađeno je 475 učenika. Općinski načelnik g. Hamdo Ejubović ovu tradiciju baštini već šestu godinu zaredom. Nastavnička vijeća osnovnih škola i Općina ove godine su se odlučili za dva naslova “Na krilima zmaja” i “Kaldrma”. To su nagrađivane knjige najljepših priča za djecu i omladinu bosanskohercegovačkih autora.

DODIJELJENO 100 STIPENDIJA UČENICIMA I STUDENTIMA



Za 100 hadžićkih učenika i studenata 23. januara 2019. izvršena je uplata stipendija za školsku/akademska 2018/2019. godinu. Na svečanosti koja je organizovana u multimedijalnoj sali Hadžići ugovore su dodijelili općinski načelnik Hamdo Ejubović i predsjedavajući Općinskog vijeća Hadžići Adi Kalem. Za ovu namjenu u Budžetu Općine Hadžići za 2019. godinu predviđena su sredstva u iznosu od 90.000 KM. Ukupno je dodijeljeno 55 stipendija za studente i 45 za učenike srednjih škola. Visina stipendije za srednjoškolce iznosi 50 KM, a za studente 100 KM mjesečno.





Održana zajednička tematska sjednica općinskih vijeća Hadžića i Trnova



U kongresnoj sali hotela “Han” na Bjelašnici 25. jula 2019. godine održana je zajednička tematska sjednica općinskih vijeća Trnova i Hadžića o zaštićenom području Bjelašnice, Visočice, Treskavice i kanjona Rakitnice. Govorilo se o pravicima i perspektivama ovih područja. Osim vijećnika i Općinskih načelnika sjednici su prisustvovali i predstavnici Federalnog ministarstva turizma i okoliša, Ministarstva prostornog uređenja i zaštite okoliša KS, kao i predstavnik Programa UN-a za okoliš- Kancelarija u BiH (UNEP-a). Obuhvat

budućeg zaštićenog područja Bjelašnica – Visočica – Treskavica – Kanjon Rakitnice će nakon provođenja zakonske procedure proglašenja zaštite obuhvatati oko 24,000 hektara na teritorijama općina Konjic, Trnovo i Hadžići. Ovom prostoru bit će dodijeljena treća kategorija zaštite – park prirode. Prema Zakonu o zaštiti prirode FBiH park prirode je prostrano prirodno ili dijelom kultivirano područje kopna s naglašenim pejzažnim, odgojno-obrazovnim, kulturno-istorijskim i turističko-rekreacijskim vrijednostima.

AKCIJA DOBROVOLJNOG DARIVANJA KRVI

U organizaciji Općine Hadžići i Zavoda za transfuzijsku medicinu FBiH 11. septembra 2019. godine u Hadžićima je organizovana

akcija dobrovoljnog darivanja krvi. Pozivu su se odazvali uposlenici i volonteri Općine. Jedna doza darovane krvi pomaže i do tri ljudska života.





Najveća postratna akcija deminiranja na području općine Hadžići u završnoj fazi

Projekat deminiranja ugroženog područja općine Hadžići pod nazivom MSP Kasatići ID 65, koji je počeo sa realizacijom krajem avgusta 2019. godine, je jedan od najvećih projekata sa aspekta sigurnosti naših građana. Ovim projektom je bilo predviđeno čišćenje 2.270.000,00 m² minski sumnjive površine, odnosno područja u čijoj blizini gravitiraju naseljena mjesta Kasatići, dijelovi Žunovnice, Lokve, rezidencijalno naselje Crepljani, dio naselja Dupovci, dio ul. Tinohovske i dio naselja Gradac. Tokom izvođenja radova deminiranja deminerska organizacija „UEM“ d.o.o. Hadžići je redovno upoznavala BH MAC i Službu za civilnu zaštitu i mjesne zajednice o otvaranju i primopredaji pojedinačnih zadataka u okviru realizacije projekta MSP Kasatići ID 65 kao što su: CI -1 Tinohovo brdo, CI 2 Smodoli, SI 2 Dolovi, SI 3 Borak, SI 1 Gaja, SI 6 Butila, SI 5 Paljike, SI 4 Gradelj. BH MAC-a je vršio nadzor nad izvođenjem radova deminiranja te će izvršiti kompletnu analizu kvaliteta izvođenja radova deminiranja, sumiranje rezultata po pitanju kontrole očišćene površine i količine

prikupljenih i uništenih minsko-eksplozivnih i neeksplozivnih ubojnih sredstava. Uništavanje sredstava koja nisu bila za izmještanje, odnosno za transport je vršio na licu mjesta tim UES Federalne uprave uprave civilne zaštite, uz blagovremeno informisanje javnosti putem Službe za civilnu zaštitu i mjesne zajednice kao i VI Policijske uprave.

Sve do izdavanja uvjerenja o kvaliteti provedenog deminiranja po projektu MSP Kasatići ID 65 od strane BH MAC-a predmetna površina se ne smije koristiti. O izdavanju predmetnog uvjerenja građani će biti blagovremeno upoznati.





MIGRANTSKA KRIZA

Zaključci Kolegija Općinskog vijeća nakon održanog hitnog sastanka



Kolegij Općinskog vijeća Hadžići je nakon održanog hitnog sastanka upriličenog 3. decembra 2019. godine u Sali vijeća na kojem je razmatrana aktuelna situacija u vezi sa migrantskom krizom na području općine Hadžići, donio sljedeće zaključke:

Zahtijevamo od nadležnih institucija da se migranti rasporede ravnomjerno na području cijele Bosne i Hercegovine.

Tražimo obavezno rasterećenje migrantskog centra Ušivak i smanjenje broja migranata u tom centru te njihovo premještanje u drugi migrantski centar.

Zahtijevamo od Vlade Kantona Sarajevo da u Budžetu za 2020. godinu i Međunarodne organizacije za migracije BiH izdvoje novčana sredstava za rasterećenje javnog gradskog prijevoza na području općine Hadžići uvođenjem većeg broja autobuskih linija na relaciji od Hadžića prema gradu ili uvođenjem posebnih linija za migrante iz migrantskog centra Ušivak ka gradu i nazad.

Zahtijevamo postavljanje videonadzora od strane nadležnih institucija na području centralnog dijela općine Hadžići i posebno Mjesne zajednice Donji Hadžići.

Zahtijevamo ograničavanje kretanja migranata uvođenjem i poštivanjem kućnog reda u

migrantskom centru Ušivak, a poštivanje istog van migrantskog centra da prati nadležna policijska uprava.

Zahtijevamo od VI policijske uprave da zajedno sa Savjetom Mjesne zajednice Donji Hadžići utvrde rutu kretanja migranata od autobuske stanice u Garovcima do migrantskog centra Ušivak i da ista bude obilježena jasnim putokazima i osvijetljena.

Zadužuje se Općinski načelnik i Komesar MUP-a Kantona Sarajevo da prate situaciju na teritoriji cijele općine Hadžići i pravovremeno poduzmu sve korake u slučaju pogoršanja trenutne situacije.

Zaključak stupa na snagu danom donošenja, a dostavit će se Općinskom načelniku, Ministarstvu sigurnosti Bosne i Hercegovine, članovima Kolegija Općinskog vijeća Hadžići, premijeru Kantona Sarajevo, policijskom komesaru Kantona Sarajevo, ministru Ministarstva unutrašnjih poslova Kantona Sarajevo, načelniku VI policijske uprave, komandiru Policijske stanice Hadžići, predsjedniku Mjesne zajednice Donji Hadžići, članovima Savjeta Mjesne zajednice Donji Hadžići, Službi za poslove sa strancima BiH, Međunarodnoj organizaciji za migracije (IOM-u), Vladi Kantona Sarajevo i Vladi Federacije BiH.





Alija Imamović: Nadam se nastupu na Olimpijadi 2020. godine u Tokiju



U kabinetu načelnika Općine Hadžići g. Hamde Ejubovića 29. novembra 2019. godine upriličen je prijem za jednog od najboljih

bh. trkača i atletskog reprezentativca BiH Aliju Imamovića. Alija (22) je naš sugrađanin i član AK Novi Grad Sarajevo iza kojeg je najuspješnija godina po rezultatima u dosadašnjoj karijeri. Na svim takmičenjima na kojima je nastupao našao se na najvišim pozicijama što ga je u 2019. godini dovelo u Top 10 najboljih maratonaca na Balkanu i Evropi. Cilj mladog Imamovića jeste ostvarivanje norme i odlazak na Ljetne olimpijske igre koje će se održati u Tokiju od 25. jula do 9. augusta 2020. godine. U 2018. godini Alija Imamović i Hana Ćatić ponijeli su titulu najuspješnijih sportista Općine Hadžići.

PRIJEM RUKOMETAŠICA POVODOM POČETKA PREMIJER LIGE BIH

U povodu početka Premijer rukometne lige BiH 18. septembra 2019. godine u kabinetu načelnika Općine Hadžići upriličen je prijem za rukometašice i članove Upravnog odbora RK Hadžići. Kapiten RK Hadžići Malanović Berina uručila je zahvalnicu načelniku Hamdi Ejuboviću za nesebičnu podršku u radu i

razvoju kluba u periodu 2014-2019. godina. U protekle dvije sezone cicibanke i kadetkinje kluba osvojile su titulu viceprvaka BiH dok su seniorke u prošloj sezoni osvojile 3. mjesto u Premijer ligi BiH te postale vicešampionke najmasovnijeg takmičenja, KUP-a Bosne i Hercegovine.





Vladimir Petković posjetio načelnika Hamdu Ejubovića



Selektor nogometne reprezentacije Švicarske Vladimir Petković posjetio je 30. jula 2019. godine Općinu Hadžići i načelnika g. Hamdu Ejubovića. Naime, gospodin Petković,

Hadžićanima poznatiji kao Dado, iskoristio je priliku da se prvom čovjeku Općine zahvali za posebno priznanje za razvoj sporta koje je dobio na Svečanoj sjednici Općinskog vijeća Hadžići u povodu obilježavanja Dana općine. Petković je posljednjih šest godina najbolji nogometni trener u Švicarskoj. Prvi je trener s Balkana u posljednjih pola vijeka koji je vodio slavni Lazio. Nakon Čire Blaževića, jedini je iz regije na klupi reprezentacije Švicarske. S reprezentacijom te zemlje ostvario je najbolji rezultat svih vremena u kvalifikacijama za veliko takmičenje. Ugovor sa Savezom traje do 2020. Kaže da bi mogao i ranije otići, ako dobije dobru ponudu iz neke od jačih evropskih liga.

Načelniku Ejuboviću posebno priznanje povodom 70 godina postojanja i rada KUD "Ivan planina" Tarčin



U povodu obilježavanja 70 godina postojanja i rada Kulturno umjetničkog društva "Ivan planina" Tarčin rukovodstvo ovog prestižnog društva posjetilo je 20. novembra 2019. godine načelnika Općine Hadžići g. Hamdu Ejubovića te mu tom prilikom uručili plaketu za nesebičan doprinos u radu i pomaganju. KUD „Ivan planina“ osnovano je daleke 1949. godine. Značajnije uspjehe doživljava u posljednjih nekoliko godina gdje uzima učešće

na festivalima u Turskoj, Poljskoj, Mađarskoj, Makedoniji, Hrvatskoj, Srbiji, Crnoj Gori, Austriji, Rumuniji i Francuskoj. Nastupaju na mnogim smotrama i festivalima folkloru u BiH. Društvo broji oko 150 članova, okupljenih uglavnom oko folklorne i muzičke sekcije. Njeguje se folklorna i muzička tradicija svih naroda BiH, ali i susjednih država. Trenutno folklorna sekcija ima 13 koreografija za koje posjeduje vlastite, originalne narodne nošnje. Organizuju jedan od najposjećenijih festivala folkloru u BiH, poznatiji kao Internacionalni festival, folkloru, prijateljstva i mira Tarčin. Ovo društvo na najbolji način predstavlja našu općinu i našu zemlju na festivalima u inostranstvu. U 2020. godini slijede pripreme za Međunarodni dječiji festival folkloru u Turskoj, koji će se održati u aprilu, te pripreme omladinskog folklornog ansambla za odlazak na Kipar.



DAN OPĆINE



O davanjem počasti herojima odbrambeno-oslobodilačkog rata 92-95., nizom sportskih i kulturnih manifestacija te Svečanom sjednicom Općinskog vijeća Hadžići 6. marta 2019. obilježen je Dan Općine Hadžići. Prije 23 godine izvršena je reintegracija privremeno okupiranog dijela općine Hadžići. Sve je, na tom području, izgledalo sablasno. Agresorska vlast je, prilikom povlačenja uništila sve za sobom. Razaranja i devastiranja privrednih objekata su izvršena u najvećoj mogućoj mjeri. Od oko 10.000 hadžićana koji su se prijavili za povratak

na predratne adrese stanovanja, ni trećina ih se nije imala gdje smjestiti, a da prostorije imaju bar minimalne uslove za život. Danas su Hadžići potpuno obnovljeni i izgledaju bolje nego ikada prije. Dodijeljena su Općinska i sportska priznanja najzaslužnijim pojedincima i kolektivima za proteklu godinu. Nihad Šehić dobitnik je "Zlatnog grba sa plaketom Općine Hadžići".

Sportsko invalidsko društvo „Igman“ Hadžići, Ferid Ramić i Fadila Mešanović dobitnici su "Šestomartovske plakete". Mreža mladih Hadžići,





HADŽIĆI 2019



Sportsko udruženje „FUTURO“, Udruženje “Veterani policije SJB Hadžići”, Vahid Đuderija, Vedad Mujić i Meho Lihovac dobitnici su priznanja “Zahvalnica Općine Hadžići”. Posebno počasno priznanje “Prijatelj Hadžića” otišlo je u ruke dr. Saliha Skopljaka.

Najuspješniji sportisti općine Hadžići za 2018. godinu su Alija Imamović i Hana Ćatić. Najuspješniji sportista invalid je Refik Reizbegović. Najuspješniji trener je Damir Beća, a ekipa FK Radnik Hadžići. Najperspektivniji sportisti općine su Adin Mujkić i Šejla Ćatić. Posebno

priznanje u razvoju sporta na području općine Hadžići dobili su Sejad Alispahić i Vladimir Petković. U okviru programa obilježavanja 1. marta – Dana nezavisnosti BiH i 6. marta – Dana Općine Hadžići promovisana je još i knjiga “Stari bosanski nišani općine Hadžići” te premijerno prikazan dokumentarni film Avde Huseinovića “Hadžići godine agresije”.

Svečanoj sjednici prisustvovao je veliki broj dužnosnika svih nivoa vlasti, vijećnika, načelnika susjednih općina, dok je poseban gost bila nana Fata Orlović.





„HADŽIĆKO LJETO 2019“




Sjajnim interpretacijama sevdaha Nusrete Kobić, Asifa Katice, Jasne Mangafić, Abida Sakalaša, Alme Subašić, Amne Aganović i Amne Horman uz pratnju orkestra Armina Hukelića Ake, zvanično je završena 13. kulturno-zabavna manifestacija Hadžićko ljeto 2019. Od 25. jula do 1. augusta svi događaji su bili izuzetno posjećeni, a sudeći po reakcijama građana Organizacioni odbor manifestacije zaslužio je visoku ocjenu za sadržaj i kvalitet zabavnih i kulturnih dešavanja. Naime, uz najljepše ilahije i kaside na stadionu Osnovne škole „6. mart“ Hadžići 25. jula otvoreno je „Hadžićko ljeto 2019“. U dvosatnom programu uživala je mnogobrojna publika, a nastupala je grupa solista „Ašik“ koju čine Jusuf Babajić, Mustafa Isaković, Tarik Omerhodžić, Šerif Delić, Hikmet Hadžiabdić i Mirnes Buko. Dan poslije, narodne nošnje i tradicionalna muzika 12 evropskih zemalja prodefilovale su glavnom ulicom Hadželi. Hadžićanima su se na festivalu tradicijom predstavili mladi iz Albanije,

Crne Gore, Češke Republike, Grčke, Litvanije, Mađarske, Sjeverne Makedonije, Poljske, Rusije, Slovačke, Srbije i Turske. Naravno, sjajan festival su obogatila i četiri kulturno-umjetnička društva sa naše općine. U subotu, 27. jula djeci i roditeljima organizovana je nezaboravna zabava na stadionu Osnovne škole „6. mart“. Ove godine nam se u Hadžiće vratio Mirsad Abdagić Kike, maloj raji poznatiji kao Kike Budalike. Uz Kikekta naše mališane su zabavljali brojni animatori, maskote...našao se tu i Baby kutak te su organizovani izazovi za djecu i roditelje. U nedjelju, 28. jula koncert je održala grupa Regina. Publika je čule nove pjesme, ali i stare hitove. Najmlađi sugrađani i njihovi roditelji imali su priliku da u ponedjeljak 29. jula u Multimedijalnoj sali Hadžići u podnevnom terminu pogledaju dječiju predstavu „Lakonoga u čarobnoj šumi“, a u večernjem terminu urnebesnu hit komediju „Ja, Bosnac“. Vrhunac „Hadžićkog ljeta 2019“ desio se u utorak 30. jula kada je po slobodnoj



procjeni preko 7.000 posjetitelja uživalo u pjesmama mladih talentovanih pjevača Džejele Ramović i Alema Kadića.

„Od srca hvala Hadžićanima i posjetiteljima „Hadžićkog ljeta 2019“. Pjevala sam širom Bosne na brojnim koncertima i manifestacijama, ali nigdje nisam naišla na ovako topao doček i odličnu organizaciju“, kazala je nakon nastupa Džejla Ramović.





RAD OPĆINSKOG VIJEĆA HADŽIĆI U 2019. GODINI



Programom rada Općinskog vijeća Hadžići za 2019. godinu utvrđeni su poslovi i zadaci Vijeća, njihov osnovni sadržaj i način izvršenja. Program obuhvata razmatranje akata koji proizilaze iz djelokruga rada Općinskog vijeća Hadžići, odnosno iz njegovih nadležnosti. Programom rada usvojenim na 22. sjednici Vijeća održanoj 27.12.2018. godine utvrđeno je razmatranje 54. tačke, a Program Vijeća je skoro u cijelosti realiziran.

U radu Općinskog vijeća Hadžići je učestvovalo 27 vijećnika. U aprilu 2019. godine vijećnica

Meliha Altoka i vijećnici Mujo Ibrica i Dženan Rizvo, a koji su u vrijeme dobivanja mandata bili vijećnici Stranke za Bosnu i Hercegovinu, su istupili iz navedene stranke i formirali Klub samostalnih vijećnika. Osim Kluba samostalnih vijećnika u Vijeću djeluju još i Klub vijećnika Stranke demokratske akcije (13 vijećnika/ca), Klub vijećnika Saveza za bolju budućnost BiH (2 vijećnika), Klub vijećnika BPS - Sefer Halilović (3 vijećnika), Klub vijećnika Socijaldemokratske partije (2 vijećnika), Klub vijećnika Demokratske fronte (2 vijećnice) te samostalni vijećnik i samostalna vijećnica.

Općinsko vijeće Hadžići je u 2019. godini održalo devet redovnih sjednica. Također, Vijeće je održalo i Prvu tematsku sjednicu, a u vezi sa zaštićenim područjem Bjelašnica - Visočica - Treskavica - Kanjon rijeke Rakitnice. Vijeću su tokom godine dostavljani na razmatranje i usvajanje određeni akti za koje se ukazala potreba za usvajanjem, a koji nisu bili planirani Programom rada za 2019. godinu. Budući da je sam Program rada Vijeća okvirnog karaktera, Vijeće je tokom godine





blagovremena priprema materijala od strane predlagača i obrađivača materijala. Kolegij je također razmatrao i druga pitanja u okviru svoga djelokruga.

Vijeće je tokom 2019. godine usvojilo Odluku o izmjenama i dopunama Budžeta Općine Hadžići za 2019. godinu, a kojom je Budžet Općine povećan na prihodovnoj strani u iznosu od 3.946.514,00 BAM te ukupni Budžet Općine Hadžići za 2019. godinu iznosi 17.942.514,00 BAM.

razmatralo i dodatne materijale pa se zbog ukupnog broja razmatranih i usvojenih materijala rad Vijeća može ocijeniti uspješnim.

U 2019. godini na sjednicama Vijeća je razmatrano oko 97 tačaka dnevnog reda. Općinski načelnik i Službe Općine su bili u ulozi predlagača i obrađivača materijala za najveći broj tačaka razmatranih na sjednicama Vijeća. Ostali obrađivači materijala su bili javna preduzeća, javne ustanove kao i drugi koji su po zakonu obavezni da Općinskom vijeću prezentiraju materijale, odnosno informacije, izvještaje ili druge materijale. Uspješnom radu Vijeća doprinijela je kvalitetna priprema sjednica od strane radnih tijela i Kolegija vijeća, kao i

Budžet Općine Hadžići za 2020. godinu, kao važan finansijski dokument, je usvojen na 31. sjednici Vijeća u mjesecu decembru 2019. godine.

Vijećnicima su kroz Izvještaj o izvršenju Budžeta Općine Hadžići za period 01.01-31.12.2018. godine, Informaciju o izvršenju Budžeta Općine Hadžići za period 01.01-31.03.2019. godine, Izvještaj o izvršenju Budžeta Općine Hadžići za period 01.01-30.06.2019. godine, Informaciju o izvršenju Budžeta Općine Hadžići za period 01.01-31.09.2019. godine transparentno predstavljeni načini utroška sredstava po Službama Općine kao i izdvojena sredstva za kapitalne projekte, tekuće grantove, grantove neprofitnim organizacijama i ostalo.





Tokom 2019. godine Vijeće je usvojilo i druge akte, odnosno rješenja i odluke iz svoje nadležnosti. Tu se posebno izdvajaju: Odluke o dodjeli Općinskih priznanja (ukupno njih 11), Odluka o izmjenama i dopunama Budžeta Općine Hadžići za 2019. godinu, Odluka o načinu i uslovima prodaje građevinskog zemljišta u svrhu izgradnje, Odluka o usvajanju izmjena i dopuna Regulacionog plana „Privredna zona Hadžići“ (skraćeni postupak), Odluka o provođenju izmjena i dopuna Regulacionog plana „Privredna zona Hadžići“ (skraćeni postupak), Odluka o izmjenama i dopunama Odluke o usvajanju Plana ulica s aspekta prostorne funkcionalnosti, Odluka o izmjenama i dopunama Odluke o građevinskom zemljištu, Odluka o zaštiti izvorišta vode za piće „Brečak“, Odluka o zaštiti izvorišta vode za piće „Ramići“, Odluka o zaštiti izvorišta vode za piće „Kradenik“, Odluka o zaštiti izvorišta vode za piće „Ljubovača“, Odluka o zaštiti izvorišta vode

za piće „Krupa“, Odluka o zaštiti izvorišta vode za piće „Jeleč“, Odluka o zaštiti izvorišta vode za piće „Garovci“, Odluka o zaštiti izvorišta vode za piće „Ormanj I“, Odluka o zaštiti izvorišta vode za piće „Ormanj II“, Odluka o zaštiti izvorišta vode za piće „Matići - Ušivak“, Odluka o zaštiti izvorišta vode za piće „Malotina“, Odluka o zaštiti izvorišta vode za piće „Dukat“, Odluka o zaštiti izvorišta vode za piće „Mehina Luka 1 i 2“, Odluka o zaštiti izvorišta vode za piće „Mehina Luka 3“, Odluka o zaštiti izvorišta vode za piće „Dobra Voda“, Odluka o zaštiti izvorišta vode za piće „Perkovići“, Odluka o zaštiti izvorišta vode za piće „Crno Vrelo“, Odluka o zaštiti izvorišta vode za piće „Lužak i Slatina“, Odluka o usvajanju Regulacionog plana „Sportsko - rekreacioni centar Tarčin“, Odluka o provođenju Regulacionog plana „Sportsko - rekreacioni centar Tarčin“, Odluka o usvajanju Regulacionog plana „Bosnić polje“ Hadžići, Odluka o provođenju Regulacionog plana „Bosnić polje“ Hadžići, Odluka o zaštiti i zaštitnim mjerama za izvorišta pitke podzemne vode bunara B-1 u području pogona „Coca - Cola“ HBC B-H d.o.o. Sarajevo, Odluka o zaštiti izvorišta vode za piće za bunar OB-1 u krugu pogona MI „Ovako“, Odluka o zaštiti izvorišta vode za piće „Puhovik“, Odluka o izvršavanju Budžeta Općine Hadžići za 2020. godinu te Odluka o imenovanju općinskog pravobranioca Općine Hadžići.

Vijeće je također usvojilo i Odluku o pristupanju izradi Regulacionog plana Stambeno naselje





„Miševići“ Hadžići, Odluku o pristupanju izradi Plana parcelacije Stambeno naselje „Češće“ Tarčin, Odluku o pristupanju izradi Regulacionog plana Stambeno naselje „Ušivak“ Hadžići i Odluku o pristupanju izradi Plana parcelacije Stambeno naselje „Drozgometva“ Hadžići.

Osim navedenih akata, a u skladu sa svojim nadležnostima, vijećnici su razmatrali i Izvještaj o radu Pravobranilaštva Općine Hadžići, Izvještaj o radu JU „KSIRC“ Hadžići i Izvještaj o radu JKP „Komunalac“ Hadžići za 2018 godinu,

te planove za 2019. godinu ovih pravnih lica čiji je osnivač Općina.

Također, razmatrane su i informacije o radu KJP „Sarajevo-šume“, Uprave za šumarstvo Kantona Sarajevo, Policijske stanice Hadžići, JU „Domovi zdravlja“ Kantona Sarajevo - Ambulanta Hadžići, Službe socijalne zaštite, KJKP „RAD“, „Elektrodistribucije“ Sarajevo, KJKP „GRAS“, KJKP „Toplane“, KJKP „Sarajevogas“, informacije iz oblasti obrazovanja, kako srednjoškolskog i osnovnog tako i predškolskog te druge informacije bitne za građane ove Općine.

Općinsko vijeće Hadžići je održalo i Svečanu sjednicu povodom obilježavanja 1. marta - Dana nezavisnosti BiH i 6. marta - Dana Općine Hadžići, Svečanu akademiju povodom 25. novembra - Dana državnosti BiH te Svečani prijem Općinskog načelnika i predsjedavajućeg Općinskog vijeća povodom Nove godine.

Vijećnici Općinskog vijeća Hadžići su uredno prisustvovali sjednicama Vijeća. U slučaju





kašnjenja, ranijeg odlaska ili nedolaska na sjednicu, uredno su pravdali odsustvo. Sjednicama Općinskog vijeća je prisustvovao i gospodin Hamdo Ejubović, općinski načelnik, te pomoćnici Općinskog načelnika ili njihovi zamjenici.

Sjednicama Vijeća su u svojstvu gosta redovno pozivani zastupnik u Predstavničkom domu Parlamenta Federacije BiH sa područja općine Hadžići, zastupnica u Skupštini Kantona Sarajevo sa područja općine Hadžići, kao i predstavnici javnih preduzeća i ustanova, i drugi, kada je razmatrana određena problematika vezana za navedene institucije. Rad svih sjednica Vijeća bio je javan. Sjednice su redovno pratili mediji.

Radna tijela su, svako u okviru svoga djelokruga rada, razmatrala pitanja koja su od interesa za Vijeće, te nacрте i prijedloge odluka, rješenja i drugih akata iz nadležnosti Vijeća. U pripremi sjednica Vijeća radna tijela su dala značajan doprinos svojim mišljenjima, prijedlozima, sugestijama i prijedlogom zaključaka da sjednice budu kvalitetnije i efikasnije. Komisije Općinskog vijeća Hadžići su tokom 2019. godine održale

ukupno 22 sjednice.

Zaključci koje je donosilo Općinsko vijeće Hadžići su se odnosili na prihvaćanje informacija. Međutim, jedan dio je podrazumijevao određene aktivnosti u vezi sa realizacijom istih. Tu se posebno izdvajaju zaključci koji su se odnosili na: zdravstvenu zaštitu na području općine Hadžići, Informaciju o aktivnostima KJP „Sarajevo - šume“ d.o.o. Sarajevo na području općine Hadžići, rješavanje problema minbuskog saobraćaja, upućivanje demanta te službenog i javnog opovrgavanja neistinitih informacija iznesenih u prilogu BHTR-a, a u vezi sa zatvorom „Silos“ u Tarčinu i slično.

Osim navedenog, tokom 2019. godine Vijeće je kontinuirano pratilo aktuelnu situaciju u vezi sa migrantskom krizom na području općine Hadžići i poduzimalo aktivnosti po tom pitanju. Općinsko vijeće i Općinski načelnik su 21.02.2019. godine održali Hitnu sjednicu Kolegija Općinskog vijeća i Općinskog načelnika, te uputili Saopćenje za javnost, broj: 01-01-2-1316-3/2019 kojim su izrazili protest protiv načina na koji se rješava migrantska kriza u BiH od početka





pa do danas. Tada, a i na kasnijim sjednicama i sastancima tokom godine, naglašeno je kako prilikom rješavanja migrantske krize i smještaja migranata u bivšu kasarnu „Ušivak“ nikako nije konsultovana lokalna zajednica. Općinsko vijeće je uvijek isticalo da je situacija u općini Hadžići, zbog velikog broja migranata na području ove općine, sa sigurnosnog, socijalnog i zdravstvenog aspekta dosta složena te je pozivalo sve organe i institucije da se aktivno uključe u rješavanje iste kako bi se prevenirale neželjene posljedice. Svi raniji zahtjevi su još jednom ponovljeni na Hitnom sastanku održanom 02.12.2019. godine, a zaključci su upućeni nadležnim institucijama. Usprkos naporima Općinskog vijeća i Općinskog načelnika da se poštuju prava migranata, ali i da se ne remete uslovi života u lokalnoj zajednici, Vijeće ministara Bosne i Hercegovine i druge državne institucije, direktno odgovorne i nadležne za pitanja migranata, ne preuzimaju odgovornost za upravljanje migrantskom krizom te djeluju neodgovorno, neadekvatno i ne saraduju sa lokalnom zajednicom koja nosi najveći teret

migrantske krize. Općinsko vijeće i Općinski načelnik imaju jedinstven stav po ovom pitanju, a to je zaštita svih prava građana općine Hadžići i insistiranje na ravnomjernom raspoređivanju tereta migrantske krize na području cijele Bosne i Hercegovine.

U „Privrednoj zoni Hadžići“ nastavlja se pozitivna poslovna priča. Usvajanjem Odluke o načinu i uslovima prodaje građevinskog zemljišta u svrhu izgradnje u 2019. godini, a kojom su dvije lokacije prodate za 606.900 KM, stvorili su se uslovi za dalji razvoj proizvodnje i otvaranje novih radnih mjesta.

Općinsko vijeće Hadžići u 2019. godini poslove iz svoje nadležnosti izvršavalo efikasno, kvalitetno i profesionalno.

U 2019. godini nastavljena je izuzetna saradnja Općinskog vijeća Hadžići, Općinskog načelnika kao i Službi Općine.

Stručna služba za poslove Općinskog vijeća





Udruženje “Ars populi” u posjeti načelniku Ejuboviću



Žene okupljene oko Udruženja za afirmaciju kulture i umjetnosti “Ars populi” Hadžići predstavljaju jednu veliku i sretnu porodicu. Iz pozitivne atmosfere kao finalni produkt nastaju predivni proizvodi slike, ukrasi, tacne, vezovi... Sa djelovanjem i aktivnostima, počeli su prije nekih desetak godina. Nastali su kao saradnja između dvije bratske općine, Hadžići i Meram Konya (Turska). Rukovodstvo i članovi ovog Udruženja posjetili su 13. novembra 2019. godine načelnika Općine Hadžići g. Hamdu Ejubovića i tom prilikom mu uručili nekolicinu poklona, ručnih radova, u znak zahvalnosti za podršku koju od samog osnivanja dobijaju od Općine Hadžići.

“Zahvalni smo za svu podršku koju nam pružate. Sretni smo što postoje ljudi poput načelnika Ejubovića koji razumije žene koje su bez zaposlenja, a kojima je ovo Udruženje odušak gdje se sastaju, druže razgovaraju i izrađuju umjetnine. Osobe

koje nemaju stalno zaposlenje kroz ovo Udruženje dobijaju osjećaj da su korisne te da neko ipak cijeni ono što one naprave. I ova današnja posjeta je nama dodatno samopouzdanje. Iskoristila bih priliku da pozovem sve zainteresovane osobe pogotovo mlađe žene da nam se priključe kako bi im prenijele vrijedno iskustvo”, kazala je članica Ars populija i jedan od edukatora Azra Dedović.

Od svakog septembra počinju kursevi i radionice, a to su kursevi dekupaža, crtanje na foliji, tehnika pirografije – tehnika crtanja na drvetu. U udruženju se rade i kursevi tehnika veza. Tu obučavaju žene da uče stari bosanski, narodni vez. Tu je i vez sa krstićima, trakicama koji su prenijeli iz Turske, jer su imali edukatore iz te oblasti. Radili su i kurseve kuhanja, kurseve ebrua, kurseve turskog jezika. Dan Općine Hadžići 6. mart, skoro je teško zamisliti bez izložbe rukotvorina i dobre zakuske za goste i građane koje pripremaju vrijedne ruke članica Ars populija. Cilj im je, kako kažu, da Hadžići dobiju jedan savremeni centar za edukaciju i ekonomsko osnaživanje žena. Iza Udruženja za afirmaciju kulture i umjetnosti “Ars populi” stoje mnogobrojine edukacije i projekti te između 6.000 i 7.000 radova, rukotvorina. Edukacije također pružaju u Kiseljaku, Kaknju i Ilidži.





Premijerno prikazan film „Hadžići u godinama agresije“ autora Avde Huseinovića



U Multimedijalnoj sali Hadžići 5. marta 2019. godine premijerno je prikazan film “Hadžići u godinama agresije” autora Avde Huseinovića. U dva sata i dvadeset minuta dugom dokumentarnom ostvarenju Huseinović je donio priču o predvečerju agresije, okupaciji Hadžića, zločinu nad civilnim stanovništvom i otporu agresiji. Dugotrajni aplauz do posljednjeg mjesta ispunjene kino sale potvrda je još jednog uspješnog filmskog ostvarenja.

“Borci Armije BiH sa područja Hadžića su vojevali jedne od najznačajnijih bitaka u cijeloj BiH. O tome govori ovaj film. Igmanske bitke u ljeto 1992. godine su nešto najsvjetlije na ratnom putu ARBiH. Takođe smo prikazali fenomen ratišta Devete brdske brigade ARBiH koja se u jednom momentu istovremeno bori sa dva neprijatelja. Srspkom vojskom i HVO-om. Sve u svemu ogromna je vrijednost 60 izjava, učesnika događaja 1992-1995. U ratnoj bolnici Suhodol tih devedesetih godina rođeno je 2.000 beba. Ovaj film je trajna, neuništiva kategorija, koja svjedoči o jednom teškom, ponosnom i dostojanstvenom vremenu. Općina Hadžići to čuva od zaborava, a od večeras smo taj amanet prosljedili na one koji dolaze iza nas”, kazao je autor filma Avdo Huseinović.

Premijera je organizovana u okviru programa obilježavanja 1. marta – Dana nezavisnosti BiH i 6. marta – Dana Općine Hadžići.





OPĆINA HADŽIĆI FINANSIRALA VIDEO SPOT „ŠAM“ POSVEĆEN STRADANJU DJECE U SVIJETU



Na kraju promocije uručene su zahvalnice institucijama koje su finansijski podržale izradu ovog veoma zahtjevnog spota. Zahvalnice je uručio Mustafa Isaković ispred produkcije, zajedno sa pokroviteljom Reisu-l-ulemom dr Husein ef. Kazazovićem. Zahvalnice su primili Hamdo Ejubović, načelnik Općine Hadžići, Elmedin Konaković, predsjedavajući Skupštine Kantona Sarajevo, Jusuf Nurkić i Ibrahim Hadžibajrić.

U organizaciji produkcije Naš Film, Vijeća Kongresa bošnjačkih intelektualaca i Gazi Husrev begove biblioteke, pod pokroviteljstvom Reisu-l-uleme Islamske zajednice u Bosni i Hercegovini, 6. aprila 2019. godine, u prepunoj sali GHB biblioteke u Sarajevu, održana je promocija video spota Šam, koji je posvećen ubijenoj djeci Svijeta. Inspiracija za izradu spota, teksta, muzike i aranžmana, došla je usljed stradanja dječaka Ajlana Kurdiya iz Sirije.



DAN ZLATNIH LJILJANA



Dobitnici najvećih ratnih priznanja naše općine, porodice šehida i poginulih boraca, predstavnici Općine Hadžići i Koordinacije boračkih udruženja 8. maja položili su cvijeće i proučili Fatihu na Šehidskom mezarju

Kahrimani čime je počelo obilježavanje 9. maja – Dana Zlatnih ljiljana i Dana pobjede nad fašizmom. Okupljenima u spomen sobi Kahrimani obratili su se načelnik Općine Hadžići Hamdo Ejubović i predsjednik Udruženja dobitnika najvećih ratnih priznanja općine Hadžići Zifet Dželko Piđ. Nakon posjete Kahrimanima dobitnici najvećih ratnih priznanja, te porodica šehida i poginulih boraca dobitnika priznanja prisustvovali su polaganju cvijeća na Šehidskom mezarju Buča Potok te Svečanoj akademiji u Multimedijalnoj Sali Općine Novi Grad. Centralna manifestacija obilježavanja Dana Zlatnih ljiljana i Dana pobjede nad fašizmom održana je u Goraždu.



SJEĆANJE NA RATNE ZLOČINE IZVRŠENE NAD BOŠNJACIMA



Predstavnici federalne, kantonalne i lokalne vlasti, udruženja boraca, udruženja logoraša, članovi porodica i brojni građani 11. maja su učenjem Fatihe i polaganjem cvijeća na spomenobilježju u ulici Hadželi obilježili 27. godišnjicu od zločina počinjenog nad borcima i patriotama iz ulice XII hercegovačke brigade. Počast je odata: Kovačević Adilu, Kovačević Uzeiru, Kovačević

Dženadu, Soldo Mladenu, Kovačević Edinu Kaći, Kovačević Zijadu, Kovačević Zamiru, Kovačević Avdi, Kovačević Miralemu, Kovačević Almiru, Medić Peri, Isić Atifu, Hodžić Ismetu, Ćosić Remzi. Naši sugrađani su tih majskih dana devedesetih godina svirepo strijeljani ispred Radničkog doma Hadžići.





Da se ne zaboravi Kroz hadžićke logore je prošlo preko 700 Bošnjaka

Polaganjem cvijeća na mjestima bivših logora formiranih sredinom maja 1992. godine na okupiranim dijelovima općine Hadžići, prigodnim kulturno- umjetničkim programom, mirnom šetnjom i časom historije 10. maja obilježena je 27. godišnjica zločina nad logorašima općine Hadžići. Kroz hadžićke i druge logore prošlo je preko 700 Bošnjaka.

Najmlađi Almir Kardaš imao je samo pet mjeseci, dok je najstariji logoraš bio Mehmed Begović, koji je imao 75 godina. Za zločine počinjene na ovom području po komandnoj odgovornosti osuđeni su Momčilo Krajišnik i Biljana Plavšić, a i neki od izvršilaca Ratko Gašović, Vlastimir Pušara, Boro Krsmanović, Rade Veselinović i Nemanja Jovičić.



DAN SJEĆANJA NA POGINULE PRIPADNIKE MUP-A R BiH



Učenjem Jasina u džamijama na području općine Hadžići i polaganjem cvijeća na

centralnom spomen-obilježju ispred zgrade Općine 5. aprila je odata počast i dužno sjećanje svim šehidima, poginulim i umrlim pripadnicima MUP-a R BiH. Simboličnom obilježavanju ovog značajnog datuma prisustvovala su delegacije Općine Hadžići, Udruženja “Veterani policije SJB Hadžići”, predstavnici boračkih udruženja, porodice i građani. Cvijeće je položeno i na spomen-ploču u zgradi Policijske stanice Hadžići gdje je organizovano prigodno druženje za porodice poginulih policajaca.



Obilježena 27. godišnjica zauzimanja kasarne "Krupa"

U organizaciji Udruženja boraca "Patriotska liga" općine Hadžići i Općine Hadžići 11. maja obilježena je 27. godišnjica zauzimanja kasarne "Krupanjska rijeka" u Zoviku te pogibije prvih šehida na području općine Hadžići Mehmedalije Hujića i Nihada Fejzić. Tog 11. maja 1992. godine izvojevana je prva pobjeda nad JNA. Ova kasarna u kojoj su u to doba služili i redovni vojnici i rezervisti, čuvala je veliko skladište naoružanja i municije i predstavljala problem u komunikaciji prema glavnom gradu BiH.





Obilježena 27. godišnjica „BITKE NA PREHULJI“

Ogroman je značaj bitke na Prehulji koju su 13. maja 1992. godine izvojevali patriote nad srbočetničkim agresorom i ogroman je značaj prostora Ivan-sedla za opstanak Bosne i Hercegovine. Ovo je rečeno 13. maja 2019. godine u selu Trzanj na šehidskom spomen-obilježju gdje je obilježena 27. godišnjica „Bitke

na Prehulji“. U strategijama generala JNA koji su planirali zauzimanje Bosne i Hercegovine u kratkom roku stoji da je ključ pokoravanja Bosne zauzimanje greda Ivan-sedla, Igmana i Vlašića. Selo Trzanj je u toku agresije na BiH dalo 10 šehida od kojih su četvorica odlikovana najvišim ratnim priznanjima ARBiH i MUP-a RBiH.



Sjećanje na heroja Mumina Oputu

Gazija i heroj Armije RBiH Mumin Oputa izgubio je život 3. oktobra 1993. godine na brdu Meorište u borbi prsa u prsa sa bojovnicima HVO-a. Neustrašiv, hrabar, patriota i istinski bosanski gazija. Dobitnik najvećih ratnih priznanja Armije RBiH



„Zlatnog ljiljana“ i „Zlatne policijske značke“. Na mjesnom mezarju Vrbanja, u neposrednoj blizini Muminove rodne Smucke, 3. oktobra 2019. godine položeno je cvijeće i proučen Jasin. Ovaj datum tradicionalno organizuju i obilježavaju Općina Hadžići i Udruženje „Veterani policijske SJB“ Hadžići.



Sjećanje na 68 ubijenih i nestalih mještana Donjih Hadžića

Systematsko etničko čišćenje nesrpskog Stanovništva Donjih Hadžića počelo je 30. juna 1992. godine. Bilans tog pohoda srpsko-crnogorskog agresora je 68 mrtvih Bošnjaka, žena, djece, staraca. U povodu sjećanja na 30. juni 1992. godine na spomen-obilježju Donji Hadžići

cvijeće su položile i Fatihu proučile delegacije Općine Hadžići, boračkih udruženja, predstavnici MZ Donji Hadžići, OO SDA Hadžići te porodice i prijatelji ubijenih i nestalih. Prigodan vjerski program izveli su najmlađi članovi džemata Donji Hadžići.



OBILJEŽENA GODIŠNJICA BITKE ZA POSTOLAC-BLINJE

Na spomen-obilježju borcima Armije i MUP-a RBiH u Sastavcima kod Tarčina 20. juna obilježena je godišnjica bitke za Postolac-Blinje. U borbama vođenim s bojovnicima HVO-a 20. juna 1993. godine na širem rejonu Blinja poginuli su Zahir Karić Beli, Suad Mehmedić Sudo, Sreten Lojanica Sreto, Ismet Šarić i Adnan Turčinović

Ado. Obilježavanju su pored većeg broja građana prisustvovali i učenici Osnovne škole "Hilmi ef. Šarić". Pored Sastavaka, proučena je Fatiha na šehidskom mezarju Kahrimani. Na groblju Dub, minutom šutnje i polaganjem cvijeća, odata je počast Sretenu Lojanici Sreti.





Obilježena 26. godišnjica od pogibije sedam civila u Tarčinu

Delegacije Kantona Sarajevo, Općine Hadžići, Udruženja civilnih žrtava rata KS, Udruženja roditelja ubijene djece opkoljenog Sarajeva 1992-1995, OO SDA Hadžići, porodice i komšije ubijenih položili su 17. jula 2019. godine vijence na spomen ploču žrtvama masakra u Tarčinu te učenjem Fatihe i minutom šutnje odali počast ubijenim. Prije 26. godina, 17. jula 1993.

godine ispaljena je granata sa položaja Vojske republike Srpske iz pravca Hadžića koja je pala kod Osnovne škole Hilmi ef. Šarić u Tarčinu te ubila sedam, a ranila šest naših sugrađana. Među poginulim je bilo troje djece. Tragičnog 17. jula poginuli su: Adnan Aleta, Almasa Aleta, Omer Horman, Sanela Horman, Mustafa Nevesinjac, Mujo Svraka i Tanja Šiniković.



Obilježena 27. godišnjica stradanja mještana Grivića i Vrančića

Polaganjem cvijeća, učenjem Jasina i Fatihe na šehidskom mezarju Grivići i mezarju Vrančići 21. juna 2019. godine obilježena je 27. godišnjica stradanja stanovnika ova dva hadžićka naselja. U toku agresije na BiH, 21. juna 1992. godine tokom agresorskog napada

na Griviće i Vrančiće živote su izgubili: Hasan Dupovac, Emir Dupovac, Adnan Dupovac, Dinan Dupovac, Fahrudin Čović, Vahid Čović, Meho Čović, Derviš Mujić, Amir Mujić, Midhat Drina i Ejub Drina. Šest borca koji su poginuli bili su sinovi jedinici.





Obilježena 27. godišnjica od pogibije Čedomira Domuza i Smaje Some

Nekoliko stotina ljudi okupilo se 30. jula 2019. godine na Brezovači gdje je obilježena 27. godišnjica od pogibije Čedomira Domuza i Smaje Some. Među okupljenima bili su zvaničnici, predstavnici vlasti, boračkih udruženja, građani, komšije i prijatelje koji su položili cvijeće na Spomen obilježju. O borbenim dejstvima i ratnom putu Čedomira Domuza i njegove jedinice govorio je njegov saborac Vahid Alađuz, a Čedomirovi unuci i članovi KUD Igman iz



Hadžića počastili su prisutne i prigodnim recitacijama. Obilježavanju je prisustvovao predsjedavajući Predsjedništva Bosne i Hercegovine Željko Komšić, te je kazao kako ne smijemo dozvoliti da njihova žrtva i žrtva svih hrabrih ljudi koji su izgubili svoje živote tokom proteklog rata bude uzaludna. Dodao je kako ne smijemo zaboraviti ljude koji su dali svoje živote za odbranu Bosne i Hercegovine, ljude koji su nam omogućili da danas živimo u miru.



Marš mira iz Dubrovnika prema Srebrenici dočekan u Hadžićima

U povodu obilježavanja 11. jula Dana žalosti iz Dubrovnika je put Srebrenice krenuo “Marš mira 2019”, a 1. jula njegovi učesnici su prošli kroz Hadžiće. Njih je uz tople riječi dobrodošlice i osvježavajuću vodu dočekaao načelnik Hadžića g. Hamdo Ejubović sa svojim pomoćnicima na centralnom spomen-obilježju šehidima i poginulim borcima gdje je položeno cvijeće. Marš

je organizovan pod pokroviteljstvom Islamske zajednice Dubrovnik, a na ideju o maršu došli su članovi Društva prijateljstva “Koraci mira” iz Odžaka. Put je dug 520 kilometara. Ruta Marša mira Dubrovčana je Dubrovnik – Trebinje – Stolac – Mostar – Jablanica – Konjic – Sarajevo – Olovo – Živinice – Kalesija – Nezuk – Potočari.





DAN ŽALOSTI U HADŽIĆIMA

Obavljena dženaza žrtvama zločina

“Dragi babo, jedva čekam da ti dođem na mezar i da ti ispričam sve što sam željela u posljednjih 27 godina”

Amir Nuhanović, Šefik Nuhanović, Hasan Nuhanović, Selver Piknjač, Fahrija Hrnjić, Ahmed Lokvančić, Salko Beganović, Zahira Karavdić, Hamdo Hasanović, Mirsad Veljković, Emir Bašić i Sejfo Kadrić su 15. novembra 2019. godine pronašli posljednji smiraj na mezarju Donji Hadžići. Porodice su čekale 27 godina da se dostojanstveno oprostite od svojih najmilijih.

Tuga i prisjećanje na najteže dane u savremenoj historiji Bosne i Hercegovine – to je bila slika Hadžića. Stanovnici ove općine i drugi građani, hiljade njih, prisustvovao je dženazi koju je predvodio zamjenik reisul-uleme Husein ef.

Smajić. Želeći sačuvati život dočekala

ih je smrt. Ubijeni su tokom bijega na slobodnu teritoriju. Ruke su im bile vezane žicom, a noge kaišom u trenutku ubistva. Skoro tri decenije poslije, pronađeni su u masovnoj grobnici Lokve na Igmanu. Nedugo nakon što je ubijen njen otac, rodila se Lejla Dželilović, rođena Beganović. Identifikovala je posmrtnu ostatku oca Salke. Ona je imala posebno emotivno obraćanje.

“Dragi babo, nisam vjerovala da će doći do ovog dana... Neki dan sam te vidjela prvi put. Mami si na odlasku rekao: Čuvaj mi Lejlu... Završila sam babo fakultet, udata sam i lijepo živim... Dragi babo, jedva čekam da ti dođem na mezar i da ti ispričam sve što sam željela u posljednjih 27 godina”, rekla je Lejla, koja se nada da će biti identifikovani i sankcionisani oni koji su počinili zločin.





Na području općine Hadžići do sada je ekshumirano 130 nestalih osoba. Nestale osobe sa područja Hadžića ekshumirane su iz masovnih i pojedinačnih grobnica sa 63 lokacije. Srpsko-crnogorski agresor je iza sebe ostavio 10 masovnih grobnica, dvije zajedničke i desetine pojedinačnih. U Bosni i Hercegovini se još uvijek traga za 7.210 nestalih osoba. Među njima su i 74 nestale osobe iz Hadžića.





Odata počast heroju Hikmetu Mehmediću Hikcu

Polaganjem cvijeća i učenjem Fatihe na spomen-obilježju Gradac 20. septembra 2019. godine obilježena je 27. godišnjica od pogibije heroja Hikmeta Mehmedića Hikca, načelnika Štaba 9. brdske brigade ARBiH. Cvijeće su položile delegacije Općine Hadžići, boračkih udruženja općine Hadžići te delegacija OO SDA

Hadžići. Hikmet Mehmedić je rođen 11.09.1964. godine u selu Jeleč – Hadžići. Aktivno vojno lice. Poginuo je 20.09.1992. godine na Zagoni – Gradac, kao vojnik, na dužnosti načelnika Štaba 9. brdske brigade. Posthumno je 1996. godine odlikovan najvišim ratnim priznanjem „Zlatni ljiljan”.



“Dani otpora i herojstva Lokve 92-95”

U organizaciji Općine Hadžići i Udruženja “9.bbr” 13. septembra 2019. godine u Lokvama održana je manifestacija “Dani otpora i herojstva Lokve 92-95”. U selu Lokve, u toku agresije na BiH u periodu 1992-1995, žvotve su dali 24 šehida i dvije civilne žrtve rata.

Na spomen-obilježje kod džamije i spomen-obilježje ispred područne osnovne škole Lokve cvijeće su položile i Fatihu proučile delegacije Općine Hadžići, delegacije boračkih udruženja, predstavnici Mjesne zajednice Lokve i predstavnici Općinskog odbora SDA Hadžići





Obilježena 24. godišnjica od pogibije osam policajaca na Treskavici

Ratovi počnu kada neki zli ljudi smisle zle namjere i krenu da ih ostvare. Ratovi su događaji u kojima se neminovno gine. Kako prvog tako i zadnjeg dana. Na početku agresije na BiH, Hadžići su pretrpjeli velike žrtve kada se u ulici XII hercegovačke brigade mučki ubija

14 građana. Posljednjeg dana agresije na BiH, 11.10.1995. godine na Treskavici gine osam pripadnika MUP-a RBiH: Selim Tufo, Atif Tufo, Amir Agić, Erik Tiro, Edin Hajro, Rusmir Nikšić, Šaban Muhibić i Šemsudin Čilaš. Taj dan je potpisan Dejtonski mirovni sporazum.



Gradac Odata počast osmorici pripadnika TO BiH

Na spomen obilježju Gradac-Potoci 24. maja 2019. godine obilježena je 27. godišnjica od pogibije osam pripadnika Teritorijalne odbrane BiH koji su stali u odbranu naše domovine na liniji Ormanja. Tog dana smrtno su stradali Ahdin Džafić (komandir voda),

Nedžad Džafić, Mehmed Džafić, Suad Čomor, Haris Kahrmanović, Mevlid Lihovac, Salem Selimović. Oni su ubijeni minobacačkom granatom ispaljenom sa četničkih položaja. Istoga dana Elvedina Šehić izgubila je život nesretnim slučajem.





Obilježena 27. godišnjica DEVETE BRDSKE BRIGADE ARBIH

Deveta brdska brigada Armije RBiH 5. novembra 2019. godine proslavila je svoj 27. rođendan. Općina Hadžići i Udruženje „9.bbr.“ Hadžići i ove godine su se potrudili da se nizom aktivnosti ovaj datum obilježi na dostojanstven način. Kulminacija tih aktivnosti bilo je polaganje cvijeća na Centralnom spomen-obilježju šehidima i poginulim borcima ispred zgrade Općine te svečana akademija u multimedijalnoj sali Hadžići. Odlukom predsjednika Predsjedništva RBiH Alije Izetbegovića, 05.11.1992. godine formirana je Deveta brdska brigada ARBiH. Deveta brdska brigada je bila prva organizovana formacija Armije BiH koja je pružila otpor agresoru na teritoriji Hadžićke općine. Kroz brigadu je prošao 5.671 borac, od čega su 264 šehida, a preko 800 njenih pripadnika je teže ili lakše ranjeno. Brigada je ispunila svoju misiju, odbranila slobodnu teritoriju općine Hadžići i dio „puta spasa“ Konjic-Tarčin-Pazarić-Ilidža, kroz „tunel spasa“ do Sarajeva.





Obilježena 26. godišnjica „Bitke za Koščan“

U selu Koščan na spomen-obilježju herojima Armije i MUP-a RBiH polaganjem cvijeća i prigodnim kulturno-umjetničkim programom 27. aprila obilježena je 26. godišnjica “Bitke za Koščan”. Brojne delegacije boračkih udruženja, općina Hadžići, Kiseljeka, Kreševa i Ilidže, Kantona Sarajevo, borci i porodice šehida odale su počast najboljim sinovima Bosne i Hercegovine. Ovo selo, i kote oko njega, bilo je jedno od najvažnijih strateških tački odbrane Sarajeva u toku agresije na BiH. Bitke koje su

ovdje vodili pripadnici Devete brdske brigade protiv daleko naoružanijeg neprijatelja su legendarne u analima Armije RBiH. Jedan od tri napada na Koščan prevodio je lično Ratko Mladić, ratni zločinac osuđen na doživotnu kaznu zatvora, tada komandant tzv. Vojske Republike Srpske. Naravno i tu bitku je izgubio. Borci Koščanskih bitaka dobili su čak 11 Zlatnih ljiljana, najveće vojničko priznanje. Mnogi su u temelje naše države ugradili svoje živote i dijelove tijela.





Svečana akademija Općinskog vijeća Hadžići povodom Dana državnosti BiH



Povodom 25. novembra, Dana državnosti Bosne i Hercegovine, održana je svečana akademija Općinskog vijeća Hadžići u Multimedijalnoj sali. Prisutnima se na početku obratio predsjedavajući Općinskog vijeća g. Adi Kalem koji se prisjetio prosvjetiteljskog i renesansnog duha vremena kada su sve umne i progresivne snage imale viziju državnosti BiH. Emotivan govor održao je i prvi čovjek Općine g. Hamdo Ejubović koji je poručio da je Bosna zemlja ljudi koji je vole. Muzičko-scenski dio programa pripao je Aldijani Tuzlak Bećar koja je otpjevala dvije sevdalinke ("Bosno moja" i "Da sam ptica...") te Amni Horman koja je čitala rodoljubne citate i izreke. Tokom akademije projektovane su fotografije o ljepotama i znamenitostima BiH. Kroz program je goste vodio Haris Mirvić.





“Država”

Josipa Pejakovića oduševila Hadžićane

U povodu obilježavanja Dana državnosti BiH 24. novembra 2019. godine u Multimedijalnoj sali Hadžići izvedena je monodrama “Država” doajena bh. glumišta Josipa Pejakovića. Monodrama je nastala u ratu 1993. godine i govori metaforično o zarobljenoj

svijesti naših naroda iz vizure jednog čobana, koji iste tretira kao ovce i takve vodi kroz cijelu predstavu. Publika je sa oduševljenjem prihvatila ovu monodramu, a Pejakovića nagradila dugotrajnim aplauzom.



Promovisana knjiga “Stari bosanski nišani općine Hadžići”

U prepunoj Multimedijalnoj sali Hadžići 4. marta 2019. promovisana je knjiga Stari bosanski nišani općine Hadžići autora Vahida Alađuza. Izdavač publikacije, čiji su recenzenti prof. dr. Ćazim Hadžimejlić, doc. dr. Haris Dervišević te mr. sci. Edin Bujak, je Općina Hadžići. Hadžići su se tako u relativno kratkom razdoblju našli u središtu dvije vrijedne studije, Monografija Hadžića: Od najstarijih vremena do agresije na BiH 1992. godine (2014) i Hadžićka toponimija (2016) autora Vahida Alađuza. Djelo je u biti kruna terenskog istraživanja o islamskom kulturno-historijskom nasljeđu općine Hadžići kojeg je Alađuz uradio tokom 2017. godine.

Detaljno je dokumentirano 600 satrih nišana, a u knjizi je prezentiran izbor od 322 nišana. Vrijedna pažnje jeste i činjenica da Alađuz nišane naziva bosanskim što oni zapravo i jesu. U starijoj literaturi često ih se pogrešno naziva osmanskim što je u principu pogrešno. Nišani na području BiH su u najvećoj mjeri podizani našem bosanskom čovjeku, na našoj bosanskoj zemlji pa stoga moraju biti bosanski. Kompletan rukopis je koherentna cjelina, interesantno štivo koje će poslužiti generacijama stanovnika Hadžića koji će iz njega naučiti štošta o svojim korjenima.






Ugledni španski arheolog dr. Bendicho posjetio nekropolu stećaka na Oseniku

Rezultati istraživanja srednjovjekovnog kulturnog nasljeđa na području općine Hadžići govore da se na ovom području nalazi samo jedan stećak sa epitafom (kratki tekst u čast preminule osobe). Radi se o stećku na nekropoli „Bastahe“ Osenik. Nažalost i on je nečitljiv ukoliko se ne primjeni posebna oprema i savremena metoda u 3D formatu. Ekspert za

navedene metode je Španac dr. Victor Manuel Lopez-Menchero Bendicho koji je 10. juna 2019. godine zajedno sa prof. Bujak Edinom i Vahidom Alađuzom obišao nekropolu „Bastahe“ na Oseniku. Doktor Bendicho obavlja poslove za Zemaljski muzej u Sarajevu te je ovo bila dobra prilika da se epitaf stećka na Oseniku skenira i eventualno dešifruje.



Arheološko istraživanje nekropole stećaka „Metaljica“ Vilovac

Arheološkim istraživanjem obavljenim na nekropoli stećaka „Metaljica“ kod Tarčina koje provode Institut za genetičko inženjerstvo i biotehnologiju Sarajevo i Katedra za arheologiju Filozofskog fakulteta Sarajevo u saradnji sa Općinom Hadžići otkriveno je više od 20 skeleta. Pretpostavlja se da ih na ovoj nekropoli ima više od 500. Metaljica je po mnogo čemu jedinstvena u Evropi. Popisom stećaka iz 2015. godine na ovoj nekropoli je evidentirano 18 stećaka, međutim novo arheološko istraživanje pokazuje da se ovom lokalitetu nalazi mnogo više grobova nego što ima stećaka. Prilikom ovog arheološkog istraživanja otkriveno je još četiri nova stećka. Sve ovo govori da se radi o groblju velike srednjovjekovne zajednice i može se pretpostaviti, što i narodna

predanja govori, da bi se tu mogao nalaziti i neki sakralni objekt, srednjovjekovna crkva, ali to će potvrditi dalje analize.



Ova nekropola je odabrana od strane tima, zaduženog za arheološko istraživanje, iz razloga što se pored nekropole stećaka ondje nalazi i



jedan tumul¹ za koji se samo pretpostavlja da bi se moglo raditi o predhistorijskoj grobnici ili srednjovjekovnoj crkvi.

Primarna zadaća ovog multidisciplinarnog projekta je da se iz skeletnih ostataka pronađenih u grobnicama izolira DNK koje će se usporediti sa stanovništvom koje živi danas na tim prostorima.

Inače ovaj projekt traje već dvije godine i provest će se na području čitave Bosne i Hercegovine. U početku je to bio samo pilot projekt, istraživačnije na „Metaljici je njegova „najožbiljnija” faza.

S prvim iskopavanjem su uzeti uzorci i već su dobijeni pozitivni profili. Preliminarne rezultate imat ćemo na proljeće. Napravljene su tzv. arheo DNK baze podataka u koje će svi skeleti biti genotipizirani i njihove će varijante biti u sklopu te baze.² Institut za genetiku UNS-a će izvršiti.

U narednoj fazi će se tragati za nekim ciljanim genima koji mogu biti medicinski važni, a i da se usporede te genetičke varijante sa stanovništvom koje danas živi na ovom prostoru kako bi se vidjelo kakve su razlike ali i sličnosti. Na izvjestan način moći će se rekonstruisati život tih srednjovjekovnih ljudi, sve ono što se ne može dobiti iz historijskih izvora koji su jako oskudni i ne govore puno. Skeleti će, takođe, biti analizirani savremenim antropološkim analizama, tako da će se saznati da li su pokojnici bolovali, od čega, kakav im je život bio te da li su radili teške fizičke poslove. U biti radi se o svojevrsnoj rekonstrukciji života, ali i mogućnost govorenja o historijskim tokovima – prije 500, 1.000, 2.000 godina i sl.

Arheološkim iskopavanjem se želi saznati koliko je sačuvano stećaka, opseg nekropole i ustanoviti način sahranjivanja, ali i dobiti genetski materijal za analizu za koju se koriste savremene radiokarbonske analize. Dobit ćemo konačno i datume za sve grobove, odnosno odredit ćemo tačnu godinu što ranije nismo znali. Radiokarbonske analize skeleta će se obaviti, vjerovatno, u odgovarajućim laboratorijama u Njemačkoj ili Poljskoj. Po položaju kostura otkrivenih ovim iskopavanjem može se kazati da je to standardni položaj skeleta kakav je dominirao na prostoru srednjovjekovne Evrope i ovdje je isti takav slučaj.³



¹ Tumul (latinski naziv za humak ili manje brdo), još i gromila i mogila je veći ili manji zemljani ili kameni humak pod kojim se nalazi jedan ili više grobova.

² Naris Pojskić, direktor Instituta za genetičko inženjerstvo i biotehnologije Univerziteta u Sarajevu-intervju <https://tip.ba/2019/11/10/video-nekropola-stecaka-metaljica>

³ Edin Bujak, profesor na filozofskom fakultetu u Sarajevu, <https://tip.ba/2019/11/10/video-nekropola-stecaka-metaljica>



Sekundarno istraživanje bi trebalo pokazati postojanje prahistorijske grobnice u utrobi tumula. Takve su grobnice pravljene u bronzanom i željeznom dobu, možda prije 3.000 godina, što bi svakako bio novi domet ovog iskopavanja. Traganje za temeljima srednjovjekovne crkve će, takođe biti jedan od tercijarnih zadataka.



Oktobarsko istraživanje ove godine je rezultiralo otkrivanjem 21 skeletnog ostatka, dva ukrasna predmeta oblika naušnica te pronalaskom novih stećaka. Izvađeno je 15 skeleta i deponovano u laboratoriju Instituta za genetiku u Sarajevu. Arheološke sonde su privremeno konzervirane do stvaranja uslova za nastavak radova na proljeće 2020. godine. U istraživanju je učestvovalo dvadesetak studenata arheologije i jedan student konzervator sa Akademije likovnih umjetnosti Sarajevo. Dnevno je bilo angažovano po desetak studenata. Cilj je, u nastavku istraživanja, uključiti i odgovarajuće sekcije osnovnih i srednje škole sa područja općine Hadžići. U zavisnosti od finansijskih sredstava namjera je u narednom periodu ovdje organizovati arheološki poligon za izvođenje praktične nastave studenata arheologije i sličnih naučnih smjerova.



Općina Hadžići i njen načelnik Hamdo Ejubović, kao saradnik na ovom projektu, je jedna od rijetkih ako ne i jedina u Bosni i Hercegovini koja na direktan način podržava ovakve projekte i učestvuje u njihovoj realizaciji.





Svečano otvoren

1. Winter Fest Hadžići

Ove godine i Hadžići su dobili svoju zimsku bajku. Naime, zabavom za najmlađe 15.12.2019. otvoren je 1. Winter Fest Hadžići, koje će trajati do 15. januara 2020. godine. Kike je brojnim mališanima priredio lijepu zabavu, a bile su tu i druge aktivnosti, od zabavljanja na klackalicama, druženja s omiljenim likovima iz crtanih filmova do ringišpila. U sklopu ove manifestacije sagrađeno je i klizalište od 300 metara kvadratnih na kojem će učenici osnovnih škola imati priliku da nauče da kližu, borave na otvorenom i dobro se zabave. Posebna pažnja posvećena je šticienicima Zavoda Pazarić, djeci s poteškoćama u razvoju i djeci slabijeg imovinskog stanja kojima će se omogućiti da uživaju u svim čarima ove zimske priče sa svojim vršnjacima. Klizalište je otvoreno od 10 do 23 sata, a unajmljivanje klizaljki košta pet maraka. Pored klizališta zimsko selo u centru Hadžića ima i 15 kućica. U većini će se pripremati i prodavati hrana, topli i hladni napici, kokice, kukuruži, kesten i sl. U ostalim kućicama prodavat će odjeću, igračke, prirodne proizvode i razne druge artikle. Sve će biti popraćeno muzikom i raznovrsnim kulturno-zabavnim programom. Osim zabave i brojnih sadržaja na otvorenom, u Sportskoj dvorani bit će održan

i turnir u malom nogometu za djecu – Zimski futsal kup Hadžići 2020. Kako su najavili iz udruženja ASUS, učestvovat će 32 ekipe seniora, deset ekipa veterana i više od 40 ekipa iz raznih dijelova BiH. Pravo učešća imaju djeca rođena od 2007. do 2012. godine. Otvaranje 1. Winter Festa Hadžići obilježeno je i koncertom Eldina Huseinbegovića.





*svim građanima,
saradnicima i
poslovnim partnerima*

Sretna i uspješna Nova 2020. godina

Vaša Općina Hadzici



www.hadzici.ba

